




蜀道驛程記

ル 5
1510



易通解程記

卷一
五

表

呂
1510
1-1

625

D
1510
H1

D
12
/5/0
1-1

門山名
補卷
1511

補卷

蜀道驛程記序

自昔揚一益二并稱天府按古者虞十有二州夏九州揚州之域盡于南海五嶺之地所暨遠矣至漢始別置交州部而梁州據華山之陽西距黑水以今日輿地考之漢中與安屬秦則雍州南境也鄭房屬楚則荊州西北境也所統不及揚什一而揚益甲乙相次亡軒輊者則其山川之奇人物之美物產材用之饒蓋可知矣漢唐已來志于常氏賦于左氏傳于陳氏勾氏記于譙氏韋氏圖于宋氏諱于杜氏堂哉皇哉後有作者可以橐筆而退



矣至述征之作則韋莊李用和輩不甚著于世而
陸游之書獨傳予以康熙壬子有成都之役往來
五閱月賦詩三百餘篇世多有其本又所記驛程
二卷置篋中漫不省錄忽忽二十年往矣屬門人
盛御史符升爲予刻粵行三志因憶前事從蛛絲
鼠齧之餘譯而存之其間考古述今亦有足觀者
不忍棄也蓋蜀自獻賊之亂城廓爲墟井邑非故
自李王孟明以來割據代有而文物掃地極于今
日雖以

盛朝休養生聚迄五十年而未能復其故也陸氏

之記記其盛予之記記其衰後有攬者參互考之
可以觀世變云康熙辛未冬長至日

經筵講官兵部右侍郎前都察院協理院事左副
都御史濟南王士禎序

蜀道驛程記卷上

濟南王士禎貽

康熙十一年六月士禎奉

命偕鄭工部次公

日奎江西貴溪人順治己亥進士

典蜀試二十二日

陞辭七月朔與家兄西樵考功及家人別余方有

兒渾之痛伏枕浹旬黽勉就道留家累京師

依兄以居途次聞宋荔裳琬觀察尚在余後

荔裳新補蜀臬前五日行去歲荔裳及曹顧

菴爾堪學士施愚山閏章少叅沈繹堂荃侍

講程湟榛可則職方李容齋天馥陳說巖廷



敬二學士與予兄弟在都下爲文字之飲酬
唱最多既而愚山遊嵩少顧菴歸禾中湟榛
使并州繹堂再被召入翰林荔裳與余又將
先後入蜀存歿聚散之間不勝感槩雨抵良
鄉縣

初二日夜雨晨霽夾道青林蕭條上不見日北
望大防諸山如彈冠振衣午次涿州渡涿水
列仙傳琴高乘赤鯉于此暮抵松林店

初三日過定興縣暮抵安肅縣縣令梁舟三原
人舊共事廣陵屬寄家書于京師

初四日午次保定府治清苑縣西郭謁椒山先
生祠又謁忠烈祠甲申之難流賊破故關攻
保定同知邵宗玄及郡人光祿少卿張羅彥
兄弟御史金毓峒輩守死弗去督師大學士
李建泰賺城入之爲賊內應城遂陷宗玄等
皆死之近同知常大忠建祠祀焉抵陘陽驛
宿是日暑甚

初五日過慶都縣古望都暮抵定州州北十里
渡唐水水與滹水合流山海經云高是之山
滹水出焉水經注云滹水東逕左人城南應

劭曰中人城西北四十里或謂之爲唐水也
水出中山城北郎中阜下又有盧奴窮魚水
自涿州西南行三四百里無山渡唐水望見
西北一峯突起舟人云曲陽之嘉山也即郭
李破史思明處定自唐宋以來爲雄鎮兵燹
之後百不一存覓韓忠獻公閱古堂衆春園
舊址不可得惟蘇文忠公書杜牧之得州荒
僻中更值連江雨一篇石刻尚在按此詩乃
牧之刺黃州作坡曾謫黃後帥定武更書之
耳杜刺池刺黃後乞湖州未嘗爲定州誌誤

然中開忽見戍樓雉堞冠山而出登樓小憩
觀諸山出雲濃綠蒼鬱飛瀑淙潺爭流競響
冒雨出關危棧臨溪延緣錯互午過栢井驛
有栢井故城唐長慶初裴晉公爲鎮州招討
使駐兵承天軍即此抵平定州入山西界州
有上下二城金趙尚書秉文守此州建湧雲
樓元好問詩云莫笑吾州如斗大他州誰有
湧雲樓夜大雨

初十日夜雨夢兒渾髣髴如平生是日爲兒五
七枕上收淚成一詩是日山溜暴漲自旦至

暮凡三十餘渡輿馬甚苦揭厲抵芹泉驛芹
泉水一名桃川水又名桃江發源壽陽太平

谷流入縣水

此別一縣水非介休縣水也

十一日晨次壽陽縣使院中有韓文公使成德
絕句元祐癸酉左宣義郎知縣事孟天常子
履重刻公詩以團字為韻和作詩版甚眾大
抵牽率惟鄆陵陳棊文岡三詩合作壽陽在
春秋為馬首城韓趙魏共滅祁氏以韓固為
馬首大夫晉劉琨破劉曜于此抵什貼鎮宿
十二日晨食鳴謙驛榆次縣境春秋昭八年晉

侯築虎祁之宮有石言晉之魏榆即此暮抵

徐溝縣有同戈村唐高祖起兵處

十三日雨午次祁縣春秋時晉大夫祁僕邑周
禮并州其川嘔彝注云祁彝又曰温洩之澤
即爾雅九藪之昭餘祁也東南連峰疊巘縣
亘百里最奇秀者麓臺山山海經龍首山西
三百里曰麓臺暮抵平遙縣隸汾州府古陶
地帝堯初封漢曰平陶後魏避太武諱改今
名

十四日早涼發平遙三十五里憇張蘭鎮鎮為

商賈輻輳之地有類巖邑西河人好貨殖有
白圭遺風圭之言曰知不足與權變勇不足
以決斷彊不能有所守雖欲學吾術終不告
之矣夫烏氏倮得與朝請而寡婦清一女子
至抗禮萬乘此太史公所以發憤也抵介休
縣漢地理志曰界休表崧郡國志曰界休縣
有介山有縣上聚介子推廟又郭林宗墓在
縣東五里舊有蔡中郎碑子推祠側有文潞
公祠公縣人也志稱介休水利自潞公開三
河溉民田始是夕中元望莫渾沂兩兒

十五日立秋早涼介休西南二十里兩山夾立

汾水貫其中水經汾水又南過寇一作冠爵津酈

注曰在介休西南俗謂雀鼠谷入谷數十里

間道隘水左右悉結偏梁閣道汾流湍悍登

高臨深令人思垂堂之戒晡抵靈石縣隸平

陽府倚山枕河雉堞頽落不及平介間一聚

落靈石者志稱隋文帝幸太原于此獲一石

文曰大道永吉因置縣

十六日發靈石路犂确去汾水漸遠二十里登

韓侯嶺祠在山巔墓在祠後壁間詩版甚多

以沁水常倫為冠書亦有晉人風氣午次仁
義驛有韓苑洛先生小詞自跋云淮陰欲弔
興遲遲已有原忠壁上詩黃鶴樓前無李白
西風惆悵寫新詞頗有致友人董御史玉虬
文驥題韓侯祠句云春雨王孫草靈風古木
叢子最擊賞之可與常詩匹敵也暮抵霍州
自靈石西南盡日行崚崱間南望高峰入雲
即霍太山禹貢所謂岳陽也昔晉獻公滅霍
霍哀公奔齊晉國大旱卜曰霍太山為祟乃
使趙夙召霍君奉祀歲復穰自唐開元以來

國有大事望秩視五岳焉汾水過城西與彘
水合又曰彘縣周厲王流于彘者也

十七日發霍州午次趙城縣周穆王以封造父
按蜚廉有子二人惡來之後曰非子是為秦
嬴惡來弟季勝其後曰造父為穆王御平徐
偃之亂賜以趙城為趙氏晡抵洪洞縣郡國
志河東郡楊縣晉羊舌大夫叔向邑漢書揚
雄傳揚在河汾之間周衰而揚氏或稱侯號
曰揚侯會晉六卿爭權偪揚侯揚侯逃于楚
巫山按雄氏揚當是揚縣楊德祖言吾家子

雲王氏談錄嘗辯之縣有師曠里城外清泉
萬道彌望稻塍小憇道旁韓忠定公文園登
樓望九箕玉峰諸山煙姿出沒今人作印渚
間想薄暮次公至次公後予三日行及予於
此

十八日洪洞城南十里過臯陶祠墓午次平陽
府治臨汾縣古冀都也昭二十八年韓宣子
與趙魏共分祁氏羊舌氏之田以趙朝為平
陽大夫宣子卒子貞子徙居此姑射山在西
南山海經姑射之山無草木多水又南水行

三百里曰北姑射之山又南三百里曰南姑
射之山姑射有三未詳汾水經城西南入襄
陵縣界自是不復沿汾行暮抵趙曲鎮屬襄
陵

十九日過蒙城驛驛北有橋曰豫讓橋地在太
平曲沃界與趙城國土橋皆傳疑也暮抵隹
馬驛雨次公示見和介山懷古詩

二十日雨次公先行予後發人馬行山谷泥淖
中聞喜縣東北五十里雙碑對峙一為唐晉
國裴文忠公故里一為宋豐國趙忠簡公故

里文忠佐元和中與雖中遭讒間卒以功名
終忠簡志存恢復一忤權奸遠竄吉陽賚志
以歿悲夫午次董澤左氏文公六年蒐于董
澤晉太史蔡墨所稱颺叔安有裔子曰董父
擾蓄龍以事舜賜姓曰董氏曰豢龍封諸駿
川是也暮抵聞喜縣古曲沃史記昭侯元年
封成師于曲沃今曲沃縣乃古新田魏獻子
所謂新田土厚水深有汾澮以流其惡是也
漢書武帝元鼎六年將幸緄氏至左邑桐鄉
聞南越破以為聞喜縣涑水在城南水經涑

水出河東聞喜縣東山黍葭谷酈注俗謂之
華谷至周陽與洮水合今城東二十里有周
陽城涑水在嘉隆前屢苦衝決先太師諱象乾
字齊字今此邑環城創築石堤一百六十餘丈迄今
百年邑無水患與史公載德李公復聘文公
作申公田喬公允升合祠俎豆不衰又有特
祠在東門予謁祠下父老子弟聚觀有泣下
者漢朱仲卿曰我故為桐鄉吏其民愛我後
世子孫奉嘗我不如桐鄉民後葬桐鄉西郭
共為起冢立祠歲時祠祭不絕此亦一桐鄉

也

二十一日雨午次弘芝鎮安邑縣境暮抵猗氏
縣注涑水又西逕猗氏縣故城北文公七年
晉敗秦于令狐闕駟曰令狐即猗氏也按猗
氏古郇伯國晉公子瑕撫其地又曰郇瑕春
秋晉謀去故絳大夫曰郇瑕地沃饒而近鹽
柳子厚所謂猗氏之鹽是也秦立郡縣以猗
頓所居改今名城中有莊武王廟祀唐馬燧
興元元年燧討李懷光駐此

二十二日次臨晉縣僖公十五年秦伯伐晉戰

于韓原築高壘以臨晉故名漢書以臨晉屬
左馮翊西南望中條山剎那之間俯仰萬態
唐末司空表聖避地居王官谷谷在中條春
秋秦伐晉取王官及郊者也暮抵蒲州古蒲
阪唐爲河中府又爲中都五代北宋皆爲重
鎮中條在城南十里青浮睥睨又有歷山媯
汭所出有英皇二女祠今吾鄉濟南亦有歷
山訛爲舜耕處有舜祠非是水經注稱剎始
寧二縣界亦有此訛矣濮陽亦有歷山雷澤
二十三日竝中條山行人家煙火與雲嵐相雜

栢林數十里菁葱彌望過首陽山山在中條
西南居雷首之陽故名首陽夷齊廟在其麓
至此坡陀益高下見黃河河南連山縣縣不
絕三峰峭拔迥出天外知是華岳也時見白
雲逢逢自山半出惝恍無定姿心目爲之清
曠至風陵渡渡河戴延之所謂風追也對岸
即潼關入陝西界水經注云秦穆公帥師送
公子重耳涉自河曲黃河自龍門南下至潼
關折而東流故曰河曲也河水歷船司空與
渭水會即此地潼關古桃林塞秦立函谷關

漢武始廢函谷守潼關今關西一里有潼水
西征賦所謂遡黃巷以濟潼也昔哥舒一敗
而明皇幸蜀近孫司馬傳庭一敗而賊騎長
驅入關僭號明因以亡孫樵銘潼關甲云潼
關之甲完吾誰與安潼關之甲弊吾誰與濟
有慨其言今駐分守道一叅將一西安府撫
民同知一謁關西夫子墓石闕尚存地曰潼
亭晚抵華陰嶽鎮宿西嶽廟碑版甚多唐刻
僅存顏魯公紀遊數字適同鄉宋方伯艾石
可發
自蜀臬遷粵轄相遇于此同宿萬壽閣

下略悉蜀道之難燈下作書寄家

二十四日昧爽登萬壽閣閣南與太華相對東
指河潼北眺涇渭西望終南雜樹薺浮川原
繡錯閣上懸明高帝御製夢遊西岳文別艾
石冒雨行五里次華陰縣自潼關而西垂楊
夾衢稻香盈路頗忘行役之勞縣古陰晉地
三峰俯其前兵燹之後巷無居人惟嶽色不
改城郭人家在雲氣中過汾陽王里暮抵華
州州故鄭地武公爲周司徒隨平王東遷更
居新鄭此其故都也少華在州城南與太華

本一山何仲默所謂各望其地異名號者也
終南二華之陰泉流交錯田宜秔稻最稱沃
壤華之西溪多水竹菱芡相傳子美爲華州
司功曾遊之稱小曲江州人郭宗昌字胤伯
博雅好古文奇字著金石史時鑿屋趙岫亦
撰石墨鐫華若干卷蓋呂與叔薛尚功一流
錢牧齋詩云關中汲古有二士郭髯趙岫俱
嗟峨

二十五日發華州月出少華之巔林風不絕行
十里始曙自遇仙橋至赤水橋浦樹山煙應

接不暇漁川江村諸原之水北流入渭所經
午次渭南縣縣南倚豐原北負渭水酒水自
石鼓山北流匯于城西注稱首水逕秦步高
宮東歷新豐原東北逕步壽宮又北入渭首
水即酒水也有白太傅寇萊公祠墓午次新
豐漢文帝令慎夫人鼓瑟指邯鄲道慷慨悲
懷處過鴻門坂有留侯舞陽侯廟暮抵臨潼
縣秦驪邑漢陰盤櫟陽地驪山負西城華清
宮在山北麓宋改爲靈泉觀雍大記云溫泉
在臨潼縣南一百五十步泉凡三泓自山麓

琮鐸而下至城西門散落溪谷流爲潼水傳
稱宮中自供奉二湯外更有湯十六所甃以
文瑤密石中央有玉蓮花捧湯又以沈香木
爲山錦繡爲鳧雁明皇時泛釵鏤小舟嬉遊
焉時松聲滿山流水東逝唐人云繡嶺官前
鶴髮翁猶唱開元太平曲俯仰盛衰之際爲
之惘然泉上宋元以來詩版甚多有蔡京書
朝元閣三大字按圖經朝元閣在老君殿北
當踞山巔閣廢故置諸此山上有羯鼓斜陽
吹笛之樓明珠南箏長生之殿及鬪雞舞馬

飲鹿毬場諸蹟皆為樵牧之場惟東西繡嶺
綺石層松尚為登眺佳處浴罷宿泉上公署
即九龍殿故址也

二十六日過灞橋橋旁兩岸皆植楊柳古名銷
魂橋也恨人羈客至此黯然方輿記漢灞橋
在古長安城灞城東二十里南北兩橋以通
新豐道唐灞陵橋在京兆通化門東二十五
里近文帝灞陵橋蓋有二雍大記灞水即古
滋水出藍田谷會渥漣井流入渭渥水輞谷
水也方輿勝覽云秦穆公霸諸侯更滋水為

灞水以彰霸功三輔黃圖云漢文帝因山為
藏就其水名以為陵號故曰灞陵又西渡漣
水地里志漣水出南陵縣之藍田谷西北流
至灞陵入灞水酈注云漣水出京兆田谷北
至灞陵入渭關中八水之二也上長樂坡望
終南遶長安城東北憇北關寄家書京師按
長安舊城有三漢都城在今府西北二十里
名北斗城直子午谷隋于漢故城東南據龍
首川為新都號大興城直石鼈谷唐因之宋
呂汲公大防嘗刻長安圖今西安府治長安

咸寧二縣何仲默以為當在隋唐宮城之間也午後西行經漢武帝通天臺故址望高帝長陵渡豐水注云豐水出豐溪西北流昆明池水注之北入于渭渭水在咸陽城下時秋漲不得度循渭北行六七里始得舟返照初霽亂雲乍歸南望白閣紫閣諸峰紫翠萬狀漢陂高冠潭諸勝皆在咫尺杜詩錯磨終南翠顛倒白閣影岑詩遙看白閣雲半入紫閣松形容酷肖兩易舟始抵西岸暝色欲來望舟上人歷歷在終南嵐氣中抵咸陽縣

二十七日故人劉戶部介菴

元勳

家居侍養入

城相慰勞久之別去咸陽即周豐鎬秦故都境內帝王將相陵墓最多文武成康周公太公皆葬城北畢郢原上漢長陵安陵平陵渭陵亦在焉高冢纍纍絡繹相望午次興平縣過武帝茂陵縣周懿王所都犬丘地項羽封章邯為雍王亦都之萬曆中耕人得一小印龜紐方寸許文曰雍王章邯印漢武置茂陵縣屬右扶風西三十里馬嵬坡太真葬處在始平原荒落殊甚相傳出白土名貴妃粉唐

降金城公主於吐蕃駐此更號金城

二十八日午次武功縣岡阜四遶城倚雍原城
東有漆水山海經云踰次之山漆水出焉北
流注于渭水經注又謂之武功水也古有釐
氏國后稷始封地漢曰武功地理志云太乙
山古文以爲終南垂山古文以爲敦物皆在
縣東今太乙屬整屋太白即垂山武功二山屬
郿雍大記云古武功在渭水南今郿縣地則
今之武功乃漢書之釐也記又云永平八年
復自渭水南徙武功縣于故釐城然地理志

郿釐武功并隸右扶風亦所未詳城南有慈
聖寺唐慶善宮即文皇所生之地武功蘇氏
自子卿後代有名人項背相望苻秦時道質
第三女蕙嫁扶風竇滔滔鎮襄陽蕙織錦爲
迴文詩寄之首尾七千九百五十八首自云
徘徊宛轉自成文章非我佳人莫之能解唐
則天后及宋閨秀朱淑真并記其事黃山谷
詩千詩織就迴文錦如此陽臺暮雨何只有
英靈蘇蕙子更無悔過竇連波明正德間康
德涵罷官居汧東與鄠杜王敬夫競爲樂府

至今海內艷稱之康故居在渭河之西故又稱許西云暮抵扶風縣隸鳳翔府扶風岐周故地漢三輔之一漢右扶風領縣二十餘此其一隅耳城東門外漆漳二水合流水南有孤阜曰飛鳳山上有馬伏波及三班曹大家祠今城西有伏波村班家臺城非有織錦巷又東南有絳帳村馬季長傳經處

二十九日過漢伏波將軍墓又過龍尾坡唐鳳翔節度使鄭畋破黃巢于此午次岐山縣岐周故城宇文氏割涇州鶉觚縣地置三龍縣

隋更今名岐山梁山三龍山皆在東北城負其陽山下有周公廟亦曰周邸與太公召公合祭注雍水又東南流與杜水合水出杜陽

山

在鳳翔縣

其水南流謂之杜陽川東南流左會

漆水徐廣曰漆水出杜陽之岐山是也漆水南流大轅水注之即岐水也暮抵鳳翔府治鳳翔縣東坡先生簽判鳳翔日作八觀詩石鼓今在太學詛楚文王右丞吳道子畫皆已不存惟東湖無恙岐州水苦鹹濁獨此水味絕甘美多荷芰修竹爲郡中遊觀之最府署

有東坡九日獨遊開元寺懷子由詩石刻完好和之石鼓山在城東即周宣王所鑿獵碣處也

三十日出鳳翔南郭遙望陳倉山直插天漢與太白終南相連亘秦蜀大阻也渡汧水酈注汧水出弦蒲藪逕汧縣故城非史記秦文公東獵汧田是也又東逕吳山即西鎮古之汧山也又東南逕隄糜縣故城逕郁夷縣又東流入于渭渡金陵河河出五峰山亦東流入渭渭水自渭源來經數百里至陳倉城南其流

始大非會諸水以至咸陽又過古陳寶祠今名祀雞臺城東二里有泉散流山麓曰娑羅泉泉出山巔金臺觀張三丰所居也晡抵寶雞縣秦武公都雍陳倉城即此縣西南彌望連峰疊巘杳然無際咏坡詩非客初來試新險蜀人從此送殘山感嘆久之夜大風寒甚閏七月朔寶雞城南渡渭水何仲默云渭水在渭源縣甚清淺多石子磊磊然至寶郿乃沛然成洪川也又二三里過清澗河水特澄碧棧中煎茶坪以東諸澗之水滙為此河東下

蜀道驛程記
入渭溯清澗而上過益門鎮鎮元平章李思
齊築石壁峭絕往往瀑水成川聲若奔霆一
徑如髮明滅亂峰中入棧之始車怠馬煩五
十里次觀音堂假宿僧舍舍後修竹數十清
泉一泓出石壁下頗足流玩

初二日陰晦過和尚原煎茶坪坪高出衆峰上
俯視四山雲霧如沆瀣一氣皆在足下循山
麓而西稍有平田村聚山南渡大蘭河河流
至階成文禮間爲白水江南至四川昭化縣
與嘉陵江同入閬中次黃牛堡吳璘以強臂

弓退敵處暮抵五星臺宿

初三日晴霽小憩石關即大散關也關下有
大散水又曰故道水史記漢高祖從故道襲雍
敗章邯于陳倉今尚有故道廢縣水西南流
與嘉陵水合西過兩當略陽界出陽平關入
蜀江午次鳳縣相傳周文王時鳳皇集此唐
爲鳳州宋南渡後川陝要害也城非一里豆
積山上有崖閣下臨嘉陵水唐冲妙先生隱
處是日從人買得鸚鵡四

初四日登鳳嶺或曰鸞鷲山是以前道所云得鳳

之三而鳳集之者也嶺直上二十里人馬踏
石稜上行始易小輿才十許里風氣寒甚添
絮衣山巔有僧閣四眺無所見類子厚所賦
囚山也下山十五里過新紅舖兩壁對峙石
勢如竒鬼攫人一水自東山來極清駛巨石
扼之更作澎湃石梁屢折頗似人家林園午
次廢丘暮抵南星鎮

初五日枕上聞急雨淙淙四山草木有聲如甲
馬馳驟冒雨即行諸山出雲縷縷石上過古
陳倉道即兩當道也度柴關嶺嶺上下二十

里石齒廉利如劍鏑下嶺沿青羊河行河流
挾雨益怒巨石怪醜時來壓人幽篁叢木蒙
茸數十里不見山巔行人與虎豹蛇虺爭一
綫聞其南紫栢山有巖洞七十二為仙真栖
止之所次留壩天已暝止宿夜雨稍霽

初六日雨止趨武關以小舟渡入褒城縣界山
多猿多鸚鵡自画眉關而下至馬道百里間
俗謂二十四馬鞍嶺險峭特絕一嶺上下登
頓輒數里上如猱升下如驚行外俯迅流內
倚絕壁石磴連卷其中山骨呈露不受寸土

壽藤古竹輻輳四垂石壁如厂如突如城如
礪如步欄如堂皇如屠廡竒態殊狀流玩不
給飛泉出石罅奔流千尺與江水鏗鎔相亂
棧中之水大約有四支茶坪以井泉水井流
為清澗河入渭為一支茶坪以南泉水西流
至階州西和成白水江為一支鳳縣以井斜
谷大散嘉陵諸水西流由徽州兩當畧陽成
嘉陵江為一支柴關以南青羊水西南至武
關北褒水從東來注之俗曰黑龍江合流至武關石
溝水從西來注之合流至馬道驛樊水從西

來注之又南合青橋沙河諸水以入漢江其
大較如此西都賦注褒斜谷其水南流蓋未
詳也馬道相傳鄼侯追淮陰至此或云在巴
山或云孤雲山未知孰是客舍後枕江流如
百萬甲馬聲使人悲壯

初七日發馬道渡青橋河食青橋驛再渡沙河

自馬道至此山頑劣少竹至觀音碛舊名閭王碛賈中丞

漢復易今名竒石插天犀株林立飛湍箭激疑為深

淵其色黝黑潭而不流憑高下瞰令人魂悸
有舊碑在道左大書雲棧首險近陝撫賈中

丞煨石開道自此迄寶雞凡木石之工九百
三十八丈有奇又于此劂大石置欄楯行旅
便之余在京師時友人宋荔裳琬作棧道平
歌紀其事語最豪健沈繹堂荃書之時稱二
絕今已陷石嵌絕壁余踏危石奔浪仰視略
見髣髴因賦詩懷二君又二十里至七盤嶺
雞頭關盤旋而上去天尺五孫樵云陟雞幘
之蹇墟下七折之峻阪謂此也此地視鳳嶺
僅及其半然乘高南望梁州沃野川原曠然
褒水近縈漢江遠抱連日行鼠穴中忽如負

青天睹白日心目洞豁按何仲默雍大記云
西南曰褒谷從褒入南曰駱谷從洋入東南
曰斜谷從郿入其棧道有四從成和階文出
者為沓中陰平道鄧艾寇蜀由之從兩當出
者為故道漢高攻陳倉由之從城固洋縣出
者為斜駱道武侯屯渭上由之從褒鳳出者
為今雲棧道漢王之南鄭由之余所經歷谷
中驚湍飛棧鳥駭獸逸殊有孫樵之賦不及
詳者其他三道險阨又可想見因憶李供奉
云邇來四萬八千歲不與秦塞通人煙歐陽

蜀道驛程言
四門云秦雖有心蜀雖有情五萬年間夔不相接近實錄也下嶺次褒城縣宿褒城古褒國禹封其子為褒侯都此元微之詩花疑褒女笑棧想武侯征是也褒水出谷流至城東南入漢江酈注褒水又東南歷褒口即褒谷之南口也北口曰斜又南逕褒縣故城東即褒國西南有箕谷鄭子真谷口也

初八日渡褒水循山河堰堰上有漢相祠祀蕭曹二公祠中宋碑二一慶曆二年給事郎守秘書丞知縣事騎都尉竇充撰一乾道五年

左承直郎四川宣撫使司准備差遣閻蒼舒撰書皆仿虞永興圓勁可愛四十里次漢中府治南鄭縣郡本秦惠文王置漢江自西來經城南東流由興安入楚帆檣相望風土物產大約類江廣間多魚稻蓮芡梅桂柑橘棕櫚梔子之屬漢拜將壇有二一在府治一在城南府治者今作太守圍圃桂樹皆合抱甘蕉有丈餘者次公水部來晤夜雨夢兒渾抱持痛哭而醒聽空階滴瀝聲不復成寐

初九日過次公邸故明瑞王宮也王明神宗子

天啓中與福惠二王同就國李自成入秦王
走重慶張獻忠陷重慶遇害今瓦礫滿目惟
存後殿一區改興元書院前守鍾琇所置也
朱門潭潭尚極宏麗殿前後叢桂老梅櫻桃
數十株又觀所謂西園者有亭榭四五桂花
漸落紫荊數株方作花淒艷動人有羝羊伏
草中驚人而起因憶盛時鶴洲鳧渚之樂而
今臺榭已傾曲池就平不待雍門之琴乃泣
下矣

初十日發漢中府沿漢江北岸而西復涉褒水

其南直中梁山不半里即褒水入漢處飯長
寨虛谷菴菴有黃楊二樹交柯攢葉一本萬
殊高出簷霄亦竒觀也晡抵黃沙驛水經漢
水又東黃沙水左注之酈注水北出遠山山
谷邃嶮谿曰五丈谿水側有黃沙屯武侯所
開也其水南注漢水南有女郎山山上直路
下出不生草木世人謂之女郎道下有女郎
廟俗傳是張魯女有小水北流入漢謂之女
郎水自南鄭至此七十里間水田漠漠穠稔
萬頃畝可十鍾古稱天漢不虛爾

十一日次沔縣古白馬氏東境漢武都郡之沮
縣梁武興蕃王國也水經沔水又東逕沔陽
故城南又東逕西樂城北注于漢按禹貢嶓
冢導漾東流為漢孔安國曰漾水東流為沔
酈注云至漢中為漢水是互相通稱也縣南
枕沔江渡江東南十里即定軍山漢昭烈帝
始為漢中王設壇沔陽即此丞相諸葛忠武
侯墓在山下東北向史謂遺命因山為墳冢
足容棺者也墓前有祠遺像儼然漢後皇帝
景耀五年從習隆向充之請詔為丞相立廟

于沔陽墓多枇杷橘柚冬青林前有高原土
人稱武侯坪水經注所謂高平武侯宿營處
也有八陣圖石尚存北岸稍西近郭道左有
公祠唐貞元中山南西道節度行軍司馬檢
校尚書刑部員外郎 御史沈迥撰碑尚
存近代彭幸菴澤趙大洲貞吉黃慎軒輝數
碑皆完好可讀祠堂後有琴室石琴傳是公
所御也其北即漢左將軍糜鄉侯馬超墓
十二日微雨出沔縣西門曲折行亂山中沔水
流經其中略如棧道但山庫無林木沔流舒

緩不及襄水湍悍耳西涉沮水水經沮水出武都沮縣東狼谷中又東南逕沮水戍東南流注漢曰沮口注云導源南流泉街水注之出河池縣東南流入沮縣會于沔今二水合處尚曰沮口暮抵大安驛有土城廢址唐之三泉縣宋置大安軍城東一水自西北來南注沔江曰三泉有泉三大如車輪縣得名以此大安又有龍門山潭毒關諸蹟陸放翁有遊三泉龍門及遊潭毒關羅漢院詩關即宋劉子羽築壁壘拒金人處放翁又有自三泉

泛舟至益昌詩

今四川保寧府昭化縣

今沔沮之間闊者

未丈許狹者才二三尺沙石磷磷深不沒蹀不可行舟惟略陽至陽平關舟楫可通廣元昭化去三泉尚六十里

十三日雨三十里小憩寬川舖自大安西南亂山益稠至金牛驛北望見嶓冢山峩然雲表一小水自西東流即所謂嶓冢導漾者也水纔濫觴不沒鳧雁合五丁峽水東流為沔其流始大金牛驛西三里有路通陽平關稍南入五丁峽一名金牛峽舊傳蜀王遣五丁力

蜀道志
士所開秦因以滅蜀薛文清公云蜀在禹貢
為華陽黑水梁州之域其通道中國久矣世
傳惠王以金牛詐蜀使五丁開此峽繆妄不
稽峽口懸崖萬仞陰風颯然入峽即奔峭四
合猿鳥磧絕水自峽中噴薄而出人馬從水
中行惡石如蠻象擗龍伏水中時時齧人自
峽口至五丁關十五里步步懸絙而上下峽
亦如之則偃僂循牆而走矣傳稱此峽為蜀
道第一險信然兩次寧羗州州在亂山中無
城堞本沔縣羊鹿坪地明洪武中以山寇作

亂置衛于此成化中即衛建州治明末流寇
小紅狼據之又經獻賊之亂城郭為墟宿北
關在州城隔河入夜雨不止

十四日冒雨發寧羗行十里河水大上不得渡
解鞍待渡道旁田家其人張姓自言荊州人
幼為張獻忠掠入蜀屬其僞前軍都督李定
國北寇漢中居數日李自成部將賀珍自京
師敗潰走棧道以爭漢中定國棄城遁時獻
賊軍至廣元聞敗發怒遂歸成都屠之下令
蜀諸郡屠戮無遺獻忠自統大軍駐順慶之

西充謀走湖廣時 肅王大兵已入蜀偵者
以報賊輒殺之凡殺數人無敢復言者已而
天兵奄至其部下劉進忠先降爲鄉導遂射
殺獻忠云午後水稍落乃行時洄水怒漲取
道大崖巨石嶄嶄仄徑不容跬步下臨奔湍
數十丈皆下馬捫壁彳亍而過人面如土過
百牢關關隋置初名白馬關以黎陽有白馬
關改今名孫樵云越百牢而南指憇石門之
委邃也下有分水嶺嶺東水皆北流至五丁
峽北合漾水入沔嶺西水皆南流逕七盤關

龍洞合嘉陵水爲川江按常璩云漢水有二
源東源出武都氐道縣漾山因名漾西源出
隴西蟠冢山會白水經葭萌入漢始源曰沔
故曰沔漢酈注引漢中記云蟠冢以東水皆
東流蟠冢以西水皆西流即其地勢源流所
歸故俗以蟠冢爲分水嶺即此推沔水無西
入之理又云東西兩川俱出蟠冢而同爲漢
水孔安國曰泉始出爲漾而常璩專爲漾山
漾水當是附會爲殊目矣按常氏以沔爲西
漢水其說紕謬酈注辨之謹矣又謂東西同

出蟠冢殊未明白且桑欽謂漾水出隴西氏道蟠冢山東至武都沮縣為漢水而曰至廣魏與白水合又至葭萌縣與羗水合是以漾為西漢水也又謂沔水出武都沮縣東狼谷中又曰沔水東南逕沮水戍東南流注漢是以沔為東漢水也酈氏兩疏之而未辯其非夫禹貢蟠冢導漾東流為漢漾之東流見于經者顯然如此余過武都蟠冢山下詢漾水土人指涓涓細流東南入沔者即是則漾入沔合流而東共為東漢水其源流甚明而其

上流又出分水嶺以東之水穿五丁峽而與漾合常氏既附會漾山之名以為東漢又妄以沔出蟠冢合白水為西漢是明與蟠冢導漾之文相悖桑氏又析漾沔為二條其流迥別至云漾合白水羗水則與禹貢東流為漢之文亦不符合今按通典蟠冢山有二一在天水上邽一在漢中金牛山雍大記云西漢水在西和縣源出蟠冢山西流與馬池水合此乃上邽之蟠冢在今秦州又云漢江源出沔縣蟠冢山東流入金州此乃金牛

即五丁峽之

嶓冢禹貢嶓冢導漾乃沔縣之嶓冢非秦州
之嶓冢知嶓冢有二則東西二漢源流各自
了然漾之與沔本為一流與隴西之嶓冢都
無交涉常氏之誤可不辨而明矣沮水出武
都東狼谷東南流注漢水經此條在沔水下
而此又云漾水出隴西嶓冢山東至武都沮
縣為漢水不惟兩漢水皆合于沮必無是理
而漾水近在武都之嶓冢反遠引隴西之嶓
冢東流至武都為漢其誤總在以兩嶓冢為
一山故自為矛盾如是酈氏于漾水條下又

云通谷水出東北通溪上承漾水西南流為
西漢水則未嘗按脉察理而牽合桑氏之說
以成其誤不知漾水實東南流無由西南流
與嘉陵白水相合也山海經云嶓冢之山漢
水出焉東南流注于沔郭璞云在武都氐道
縣南蘇氏書傳云漢始出為漾東南流為沔
至漢中東行為漢皆謂東漢水耳其嘉陵江
自兩當略陽出陽平關至朝天峽南逕廣元
縣又南逕昭化縣白水江自階文來入之酈
氏所稱西漢水南入嘉陵道而為嘉陵水常

氏所稱會白水經葭萌桑氏所稱至廣魏與
白水合又至葭萌與羗水合者皆此水也黃
氏日抄云漢水二源一出秦州天水縣謂之
西漢水至恭州巴中縣入江今重慶府巴縣一出大安
軍三泉縣謂之東漢水至漢陽軍入江觀此
則二漢水源流了然矣二鼓抵黃壩驛是日
冒雨涉水四十餘次夜聞呼譟聲詢之云麋
多食稼農夫野宿驅之故耳

寸五日雨過七盤關入四川保寧府廣元縣界
次神宣驛上龍洞背兩山夾峙一山如獐龍

奮脊橫跨兩山之間下有洞似重城門可通
九軌水流其中下視煙霧蒼鬱不測尋丈自
是盤折而上騎龍背行四望諸山如劍鋸戟
牙二十里許始下山渡河即分水嶺以西水
入嘉陵江處南山之巔爲朝天關孫樵所謂
朝天雙峙以虧蔽中慘慄而陰翳是也其下
江岸小有聚落止宿明日登舟

十六日夜大風晨稍霽入舟遣從騎山行舟中
寬首尾狹竹箬覆之僅蔽風雨左右用槳六
枝不施桅篷製如江浙之梭船川人呼爲板

船過朝天峽兩峽各高數十丈削立如關門
石壁上有巨洞云是獻賊所鑿可容萬夫壁
下近水多石孔昔人緣崖架棧于此三十里
一山秀拔石如劍劈上有飛仙閣江平舟駛
未午次廣元縣蜀王弟葭萌所封古苴侯國
華陽志曰晉壽縣劉氏更曰漢壽蜀檣杙曰
利州四會五達之地是也昭烈使陳式絕馬
鳴閣道即此朝天峽上有武侯籌筆驛孫樵
云眇山川以懷古得籌筆于途說指前峰之
孤秀傳卧龍之餘烈城西二里有烏奴山陸

游詩暮雪烏奴停醉帽秋風白帝放歸船者
也午微雨晡晴抵昭化縣亦古葭萌地南宋
益昌漢大將軍費禕里也唐書何易于爲益
昌令刺史崔朴乘春泛舟東下出益昌索民
挽舟易于腰笏挽舟上下刺史驚問狀易于
曰方春百姓不耕即蠶隙不可奪易于爲屬
令當其無事可以充役刺史慙跳出舟騎還
去今縣令中未知尚有如此人否廣元益昌
皆瀕嘉陵江自寧羗至此荒殘凋瘵之狀不
忍覩聞近有

旨招集流移寬其徭賦募民入蜀者得拜官數年
之後當有起色是在大吏與良有司耳近昭
化里許即桔栢渡白水江自北來與嘉陵江
合水色澄碧二水合處清濁劃然水經西漢
水東南至廣魏白水縣西又東南至葭萌縣
東北與羗水合注白水又東南逕吐費城南
即西晉壽之東北也東南流注漢水入夜月
色皎然江聲激壯舟人作渝歌與柝聲斷續
中夕不能成寐

十七日五更早發江平無風過魚尖子算錢石

箭憶期歸期上下三岐諸灘一水自劍州來
會次虎跳驛暫泊午後過長洋灘東灘竹灘
樓門灘香溪蒜渡鴛溪口鴛溪口亭子口亭
子夾岸民居數百家有良田沃野暮抵雙漩
子泊舟見月夜聞笛聲甚淒婉五更大風雨
十八日雨中過葡萄碛燒雞灘水觀音塔子山
次蒼溪縣漢昌地古賓國也有賓城盧城
華陽國志漢昌縣和帝時置縣城在嘉陵東
岸江水西南流其東離堆山有顏魯公記午
後過新開灘朱公子白崖子石羊寺瓦子灘

西門灘抵保寧府治閬中縣東北過靈山昔
蜀王鼈靈登此又有玉臺觀滕王亭子皆唐
滕王元嬰遺蹟泊舟城南閬中山下山一名
錦屏名山志云閬中山多仙聖游集從舟中
望之正似培塿雜樹籃鬚如老翁顛髮無巖
壑雲物之美定浪得名耳山上舊有少陵祠
堂遙望山半一亭蕪陋甚無樓觀臺榭蓋亂
後廢久矣江間多磴舩如水車之製泊急溜
中礚礚春簌悉用水功軋鴉之聲不絕入城
宿使院夜見螢火

十九日晴閬去成都六百餘里尚隔十一驛需
次公至約同行憶去秋在京師沈繹堂侍講
以箋索書予爲書陸務觀閬中詩云殘年作
客遍天涯下馬郵亭便似家三疊淒涼渭城
曲數枝閒澹閬中花擘牋授管相逢晚理髻
薰衣一笑譁俱是邯鄲枕中夢墜鞭不用憶
京華是時予與繹堂輩方日爲文字之飲既
書此詩意頗不懌今日到閬州始省前事豈
前定耶閬中人民城郭在川西北諸郡差爲
完好當全蜀用兵時此郡駐督撫藩臬及諸

鎮十餘皆披草萊以居數年來諸司始還成
都薄暮次公至

二十日巡行牆柱間見膠州宋童子世勳題壁
大字方圓徑寸勢甚飛動東粵方伯艾石幼
子在華陰見之未及羈貫艾石子婦姜字淑
齋亦工撫晉人書京師士夫得其統素便面
多珍秘焉午後陸行人至

二十一日出南門渡江登南岸四眺羣山迴合
志云閬江迂曲三面環之故曰閬中也遶出
錦屏山背西南行四十里抵龍山驛四無人

居雨甚

二十二日雨盡日行亂山中渡小河其水自梓
潼劍州來南流入嘉陵江小憩香潭子南部
縣界縣古南充國地土人云自獻賊亂後惟
南部蠶桑絲枲之利甲于川北又言西南舍
許即宋陳文忠堯叟兄弟故居至今稱狀元
里雨行六十里抵柳邊驛

二十三日柳邊驛西南頗見稻塍雨行四十里
次天馬山富村驛楊文忠詩才到富村風景
別竹林松徑是人家今豺虎窟穴耳窓外即

蜀道驛程記
五
荒山蟲聲四起夜不成寐

二十四日五更雨行把炬亂山中上霧下潦衣
袴盡濕午次鹽亭縣鹽亭漢廣漢地季漢分
置梓潼晉置宕渠梁易今名縣東北里許石
壁竒峭俯臨一溪曰瀾水溪東為孱亭山水
自閬州來逕城東南合梓潼水水源出劍州
陰平廢縣歷梓潼縣至鹽亭城南雲溪水出
城西來與之合三水同流入涪江酈注孱水
出孱山歷孱亭下注涪水者也又鶯溪在城
北亦流入涪溪上人家以絹為業堅潔異他

處文與可詩所云鶯溪絹也杜詩雲溪花淡
淡春郭水泠泠全蜀多名士嚴家聚德星縣
有德星春郭二橋以此縣城堞已毀居民尚
數百家冒雨出南門渡梓潼江綠光祿山行
即杜光祿坂詩所謂山行落日下絕壁者也
又三十里登蟾毒山險惡殊甚雨中望四山
林木鬢髮暝色漸合令人心悸下山行十五
里次秋林驛在深箐中目前種種如地獄變
相恐復非吳生畫筆可辨人家十餘結茅竹
在箐中土人云蛇虎雖多與人無害夜雨甚

二十五日冒雨行又十五里始出箐中稍晴午
憇高山舖山峻絕砌石為階級登頓稍易午
渡涪江江發源吐蕃入塞經松威諸州由縣
州至潼川南合中江下合州與嘉陵江合酈
注稱涪水出廣漢屬國剛氏游徼外東南流
涇涪縣西水經又云南至小廣魏與梓潼合
梓潼水自鹽亭縣下馬河來會水經云梓潼
水出其縣北界西南入于涪注稱先主嘉霍
峻守葭萌之功分廣漢以北別為梓潼郡以
峻為守有五婦山馳水所出亦曰潼水自縣

西涇涪城東又南入于涪水謂之五婦水口
也里許次潼川州漢置廣漢郡及郫縣西魏
改潼川郡隋為梓州唐至德中置東川節度
使治此今州西有廢涪城縣州東有廢郫縣
孫樵謂涪繚于郫是也子美寓此最久州有
橘亭水亭官閣諸蹟并以杜詩得名唐劉蛻
以拾遺謫寓此作文冢兜率寺中自為銘見
文泉子東山上有蘇泉相傳坡公試茶地曾
有人于泉側掘得小石刻題曰艤峽也
二十六日雨止州西門外跬步即牛頭山杜詩

青山意不盡衮衮上牛頭者也山高不丈許
無巖壑之觀寰宇記謂其四面孤絕樓閣煙
花爲一方勝槩安也上有亭即所謂牛頭山
亭子今廢渡西溪午晴晡抵建寧驛竟日出
沒荒草中土人云地多虎日高結伴始敢行
二十七日微雨自潼川西來山險稍平然泥淖
特甚人馬多蹶彌望百里田在草間午後次
中江縣本漢五城隋曰元武宋易今名銅官
山鄴江所出或謂即漢文帝賜鄧通冶鑄處
華陽志謂在臨邛于事實爲近元武山在縣

東南南江東江合流其下爲中江流入射洪
遂寧與涪江會下合州與嘉陵江會常璩云
五城縣有水通於巴漢時置五倉後因以爲
縣宋蘇學士易簡里也縣頽廢甚于潼川境
內人戶纔三十餘家驛中有膠州閨秀姜氏
題詩云清泉石上溜松風薄受霜華葉乍紅
曲路通邨知近遠一條竹杖萬山中字仿褚
河南

二十八日雨西門渡江即登天柱山盤折而上
二十里路峻泥滑徒旅鮮不顛踣至雲津橋

雖蕪沒叢箐規製尚極宏麗夾路巨竹成林
惜其荒翳蒼蔚無復本色過走馬坡山執稍
平然草樹陰晦上不見日與五丁蟾毒相似
下連山渡河野宿漢州界自閏七月朔入棧
時逾旬月途歷二千至此始出山杜詩連山
西南斷始見千里豁信為實錄夜大雨

二十九日自連山泥行二十五里渡河曰沱江
次漢州自連山至此凡三水皆自灌口來源
同派別共入金堂界下合涪江禹貢岷山導
江東流為沱是也華陽國志李冰壅江作壩

穿郫江檢江別支流過郡下溉灌三郡開稻
田沃野千里號為陸海又導洛通山洛水出
瀑口經什邡郫別江會新都大渡即此水經
云洛水自三危山東過廣漢洛縣南注云洛
水出洛縣漳山亦言出梓潼縣栢山逕什邡
縣又南逕洛縣故城南廣漢郡治今江岸有
斷碑書連山沱水四大字州城北枕沱水即
漢廣漢郡治雒縣常璩志稱本治繩鄉元初
二年移涪後治雒城與蜀郡犍為為三蜀唐
房瑄以宰相貶此州鑿西湖名房公湖漢故

一都會城中石表咫尺相望想見盛時而城堞室廬鞠爲茂草矣

八月初一日晴發漢州渡河凡三皆以竹柂川流迅激殊有戒心酈注洛水又南逕新都縣與縣水合水西出縣竹縣又與湔水合亦謂之郫江午過彌牟鎮觀武侯八陣圖惟一殘碣立道左草木荒翳不能通人陸務觀有彌牟八陣原武侯祠堂詩晡次新都縣使院爲楊用修先生故居稍東即文忠公第從蔓草中多見柱礎遺跡院內兩桂樹婆娑無復生

意昔許文休寓書曹氏自述流宕漂薄之苦虞仲翔沒齒南海至欲以青蠅爲弔客讀其詞未嘗不嗚咽用修父子遭際明時得君行道文章氣節冠冕士林乃至批逆鱗觸震霆一謫南裔長往不返觀其七十行戍稿可爲扼腕流涕也用修夫人黃亦有才情世所傳寄外詩曰歸日歸愁歲暮其雨其雨怨朝陽二語乃山谷句夫人豈竊之耶夜晴列星粲然自入棧一月來未覩此矣

初二日晴憇新都縣有唐僖宗行殿遺址石礎

尚存新都又名新郾地里志汝南亦有新郾
後漢改曰郾丘

初三日發新都過昇仙橋司馬相如題柱處午
抵成都府

蜀道驛程記卷上

蜀道驛程記卷下

濟南王士禎貽上甫

九月二十五日發成都府陸行之嘉州巡撫羅
中丞祖道萬里橋前成都守冀君所修榜曰
萬里始此藩臬諸公餞于忠武侯祠祠前祀
昭烈後祀武侯有唐裴晉公碑柳公綽書祠
西十步即惠陵昨重九與諸公謁陵下因遊
青羊宮浣花草堂後數日金方伯招泛浣花
溪迨今凡三至矣守今諸君餞于陵西騎行
次雙流縣縣已廢入新津近郭修竹萬竿人

家結屋竹中自成籬落入城即頽墉廢塹虎
跡縱橫縣古廣都地有蠶叢故城蠶叢氏所
都左太冲所謂帶二江之雙流也去成都僅
四十里郵符絡繹為嘉眉邛雅諸州要路而
新津去成都且百餘里似當議復晚抵黃水
河

二十六日騎行至新津縣渡江江流遶修覺山
下山容鬱秀宛然畫圖自雙流至新津夾道
竹林聯縣數十里居人斧斤狼籍以供槩爨
晡後兩次梓潼官野宿眉州界

二十七日雨不止騎行次彭山縣古武陽地縣
北武陽江岷江支流也江遶彭亡山下岑彭
征公孫述至武陽聞山名惡之會日暮不果
移營夜遂為刺客所害今縣城在山麓廢入
眉州午次眉遙望驀頤山蒼然可愛入城謁
三蘇公祠蘇氏紗縠行舊第也在城西偏三
面環水堂三楹中祀文公文忠文定二公左
右侍堂前二古栢甚天矯數百年物也後軒
三楹枕水題曰木假山堂祠西為瑞蓮池甘
蕉十餘本高覆簷雷池中有亭長廊週之蜀

亂後有賊號鐵脚蠻據眉祠燬州守趙君始
稍稍修復坡公石像明洪武中重刻李龍眠
筆也穎濱題贊又坡書玉鼻驛券山谷跋尾
二石頗完好保母楊氏志銘沔陽陳晦叔重
刻碑版林立惟富順李尚書長春四詩可讀
趙君貽我眉娑羅木夜雨

二十八日雨出眉州西行望魏鶴山環湖在榛
莽中一水自城東南來西流曰松江又八里
曰醴泉江二水合注岷江至松江口易輿而
騎馬行淖中過石佛山坡詩卜田向何許石

佛山南路下有爾家川千畦種秔稌者也今
彌望荒原風雨如晦數十里無炊煙最爲荒
閬涉思濛江小憇田家暮抵金流宿僧舍

二十九日冒雨騎行涉金流江江自丹稜經青
神入岷江午次夾江縣嘉定州界史記功臣
年表宣虎食邑也自巴閬走成都至眉千餘
里名都大邑鞠爲茂草入夾江境即溝塍基
布煙村曖然類吳中風物午後雨甚今喬君
數挽留余辭之遂發夾江南竹多如雙流人
家以竹爲藩微逕通出入時露茅茨或聞雞

犬聲乃知有人晚抵乾姜舖喬君至

初一日稍霽過九盤山山臨青衣江石壁如橫
磨大劍江濤奔突其下令人骨慄遙望大峩
秀出天半雲嵐萬狀積雪晶然中峩如偃僂
少峩如拱揖非來諸山蜿蜒起伏爭趨峩下
放翁望峩眉詩云白雲如玉城翠嶺出其上
異境墮我前心目久蕩漾身未到此不知語
意之工下山食連珠舖嘉定州境連岡複嶺
直達州郭一水遶郭南流注江曰竹公溪有
竹林三郎祠或云在
夜郎縣溪上人家背江面山隨溪

數曲達于州門嘉州古南安華陽志南安縣
治青衣江會云蜀王開明故治也駐上南道
舊署署枕高望山之足有高望樓窓檻軒豁
三峩正直其西問丁東院無知者門人鄭陳
季帥四子從登高望過一小寺甚荒落鄭生
曰丁東寺也一井泓然在佛殿之南即丁東
井山谷易名方響者時雨後水溢鄭生云水
涸則井半有泉鏗然下注其聲丁東然高望
一名高幟州之主山也有宋神霄玉清萬壽
宮絕頂為高幟書院登此四望其西三峩竦

嶠青衣沫若二江自西來會于雙湖岷江自
灌口成都下新津武陽經城北平羌峽至凌
雲山前三江合流浩淼無際凌雲九峰相接
又名九峰稍南烏尤馬鞍二山鱗次江岸丹
崖翠壁望若畫圖江流平遠戎瀘諸山宛在
杯案昔人謂嘉陽山水為西州冠非虛語也
日晡迫下山悵望而別約明晨登凌雲觀大
像晚晴

初二日晴遣行李入舟余以小艇由東門截流
渡江四子從行既登岸諸子請候輿馬余屐

而登焉草深石滑登頓甚苦二里許泉流夾
道石壁書凌雲第一重五大字上下山谷間
草露沾衣泥中虎跡交錯于路又四五里始
及山門門內有唐放生碑峭壁下垂石磴千
折江聲澎湃起于足下壁間多前人題字有
大書蘇東坡載酒時遊處坡詩云生不願封
萬戶侯亦不願識韓荊州但願身為漢嘉守
載酒時作凌雲遊終未踐斯語也寺創自開
元鉅麗為西南第一明末袁韜武大定作亂
寺為灰燼江岸大像開元中釋海通所鑿未

竟示寂韋臯鎮蜀始成之舊有佛閣亦燬于
兵墨莊漫錄云嘉州凌雲大像記韋臯文張
綽書字畫雄偉尋之不可得像前即三江合
流處東坡詩奔騰過佛脚謂此像南為競秀
亭由佛殿左折而上有小澗跨石梁坡公洗
墨池也旁為清音亭兩亭皆俯江于平視三
峩極曠望之致振衣于仞崗濯足萬里流差
足當之殿右為宋州守吳秘治易洞坡公有
詩又有注易洞明守袁子讓刻五碑其中一

龍馬象河洛數義文卦序二圖卦位及先後天三圖直日及大小
父母四圖外循環內變通○天六位卦納甲五圖圓倍乘方四重

及卦氣運世配方司化
子讓自有說刻碑上方殿前有卧鐘二猶是開元舊

物相傳阿羅漢像甚奇古亦付劫灰為之太
息與諸子小飲競秀亭青山白雲長江萬里
罷酒巡視石壁諸詩得州人安磐松溪四絕
句最佳聊記其二林竹斑斑日上遲鳥啼花
暝暮春時青衣不是蒼梧野却有蛾眉望九
疑青衣江上水溶溶隔岸遙聞戒夜鐘暫借
竹床聽梵放月華初到第三峰又隴右任倫
題大佛云大像何年倚翠微靈光隱隱九峰
暉可憐世歷風霜古銷却金衣變草衣餘多

不及錄舟人報船泊大像閣下循山門西麓而下不數武即至江口適舟人言此地盤渦迅急不可艤舟故由東山徒步崎嶇數里始達可笑也江干別四子登舟祭神解纜頃刻已過烏尤烏尤一名青衣山單椒秀出在九峰之後濃秀如金陵燕子磯山谷遊此爲易今名山有爾雅臺記稱郭景純註爾雅處山下產墨魚俗謂食研墨所化立春後泛子漁人以燈火照之輒止不去袁子讓詩云何人解識終軍鼠此地猶傳翰墨魚按彝陵亦有

爾雅臺未知孰是時風日沅麗澄江如練順風蕩槳倏忽數十里回望嘉州城郭居然金粉画图大峩峰頂竒雲片片作白毫光余此行所歷名山太行霍太山姑射中條太華終南太白岷山青城諸勝惟太華與峩眉差相伯仲昨一望于九盤再望于高望樓又望于玉清絕頂望于凌雲雖身未到八十四盤佳處已領其要可謂歸去得雄誇矣晚抵犍爲

泊舟

初三日大霧日出乃解纜岸上諸峰雲霧解駁

網緼輪困光景甚奇犍為漢郡領縣五曰武

陽今彭山廢縣治曰南安今嘉定州治曰棘道今敘州府治曰牛鞞今

州西有牛鞞戍今縣治有資官沈犀玉津三廢縣址入

敘州府宜賓縣界過赤崖山山色爛熳如紅

紫鞞鞞陸離可愛華陽志棘道縣濱江有兵

欄李冰燒之崖有五色後漢志作玉兵欄登

鎖江亭遙望落霞孤鶩城堞歷歷在蒼山暮

靄間晚泊敘州府合江門樊生來

初四日敘古棘道語詳史記司馬相如西南彝

傳地與烏蒙烏撒相接酈注江水又東南過

棘道縣北若水淹水合從西來注之今馬湖

江西來至合江門與岷江會常氏謂棘道縣

治馬湖水會又云馬湖水通棘道入江是也

馬湖江一名瀘江源出沈黎大渡河支流也

郡有東樓見杜詩西樓見陸詩山谷先生謫

此有味諫軒無等院流杯池諸遺跡池隔江

五里而近欲往遊不果屏山令謝相來晤別

去謝與余鎖闈共事者過南廣黑水自西南

彝界來入于江午至南溪縣縣令趙家駿君

子人也亦共事闈中依依有故人之誼縣瀕

江城無完堞闐闐寥寥茅茨不數十家今庭
可張雀羅待後舟不至遂解維行三十里晚
泊江安縣瀘州界

初五日發江安江安以東皆古江陽地過清溪
太白詩夜發清溪向三峽即此或謂李詩本
三溪三溪在嘉州北平羗峽非是午抵納溪
縣縣南有支江通永寧衛為滇南孔道過大
溪三灘清酒三甕石晡抵瀘州瀘古江陽郡
華陽志謂東接巴郡南接牂柯西接犍為北
接廣漢有荔支巴菽桃枝蒟給客橙蓋西南

一都會也山水明秀亞于嘉陽岷江東來資
江北來二水縈帶會于城之東南注云縣水

又曰洛水亦曰郾江

又東逕資中縣安漢縣至江陽縣方

山下入江曰中水江陽枕帶雙流據江洛會

也何生許生來謁同遊忠山

亦曰寶山城西門正

枕山趾上有諸葛丞相祠祠前有亭檻俯叢
竹凭檻四望羣峰屏列二水如環玦交流矣
初六日晨起與兩生登五峰泛小舟由海觀渡
資江舟中四眺晨曦晡靄煙雲卷舒遠近諸
山濃淡出沒江樓水市漁浦風帆歷歷可數

漢嘉江陽皆川南山水勝處漢嘉如小李將軍金碧画江陽則馬遠夏珪也至山麓輿而上兩生騎從穿小市居人百餘家負山映江疏畦竹圃蒼翠彌望何生云昔盛時此爲商舶輻輳之所二里至峰頂遙與牙角四峰相對有真武祠北折而下里許爲北巖寺寺前石路方廣最宜眺望延目賞心殆不暇給與兩生小坐茶話遂循小市而下復泛小舟往觀撫琴臺琴清英曰尹吉甫子伯奇至孝後母譖之自投江中衣苔帶藻忽夢水仙賜之

美藥乃撫琴而作履霜之操今江濱一石屹然云即是臺也東爲呂仙巖嘉靖中僉事崔棟少遇道人語之云異時與子相見瀘州後果分憲川南駐節于瀘一日出郭于此巖下復遇道人與語躍入巖上石壁不見崔乃即巖爲洞肖其貌祀之舊聞瀘城南使君巖爲山谷先生遊憇地滴乳巖亦有題字州人皆不能知許生云隔江有東月巖猶存山谷所題江天二字未詳即使君巖抑滴乳巖耶日將午舟人催發不及往遊遂別兩生解維東

下屢經灘險有大石尋丈偃卧江面盤渦激
迂曰折桅子夏秋江漲此號首險抵合江縣
舟中望少岷山甚奇秀一名榕山

初七日五鼓發舟詰旦行十里回望少岷日光
照映作黃金色殊恨不及登覽少岷者亦如
太華之有少華大峩之有少峩太室之有少
室但彼皆連綴而此去岷山千里矣合江有
符縣華陽志符縣治安樂水會南水通平羗
營縣水經江水又東過符縣北東南鰓部水
從符關東北注之注謂漢武建初六年以唐

蒙爲中郎將從萬人出巴符關者也縣有西
涼王祠西涼王者呂光也符秦時以將軍討
李焉之亂過此放翁謁西涼王祠詩云我雖
不識神知是山水人不敢持笏來袒褐整幅
巾蓋未詳考賦長句正之過金注子舟行甚
駛松溉牛溪之間山多赭石層松間之頗足
流玩晡抵江津縣距縣二里許小山多桐子
樹葉如渥丹與夕霞相映可愛江津古江陽
東界亦曰夔溪口水遶縣如几又曰几水隸
重慶府

初八日過猫兒峽連峰疊嶂虧蔽雲日一山突起石稜刻露其色青碧曰青石尾長年云夏秋水漲石尾沒則舟不敢行過龜亭子小山卷石孤立江中滄波四匝亦浮玉之雲仍小孤之婢媵也抵重慶府巴縣治江中遙望渝城因山爲壘邈在天際女牆闌闌繚繞山巔下被水面山號金碧瀕江人家編竹爲屋架木爲砦以防暴漲注謂江州地勢側嶮皆重屋累居數有火害結舫水居者五百餘家夏水增盛顛沒無算今渝城歲有火災蓋地勢

然也水經江水又東北至巴郡江州縣東強

水即羗水涪水漢水白水宕渠水即渝水合流左

注之庾仲雍謂江州縣對二水口右則涪內

水左則蜀外水即是水也蓋岷江自敘瀘西

南來涪江自縣梓遂諸州西北來嘉陵江自

閬果諸州巴江自蓬渠諸州東北來至合州

同會涪江南下至渝州東北朝天門與岷江

會故曰郡承三江之會實四水也三江灌輸

衆山擁蔽巨峽爲之門戶信巴蜀一大阻昔

爲川湖總督駐節市肆民居鱗次櫛比雖更

獻賊姚黃之亂尚鬱然一都會郡在宋曰恭
州吳船錄云恭爲州乃在一大磐石上山水
皆有瘴非實錄也林生來謁讀其尊人位旃
君集所作三忠傳始末甚詳三忠者故明巡
撫都御史陳公士奇重慶太守王公行儉巴
縣今王公錫也逆獻之變同日罵賊死甚烈
泊朝天門候後舟不至聞郡有元文宗御書
萬里歸程四字至今稱御書樓

初九日飯後遊塗山林生從常氏謂禹娶于塗
山辛壬癸甲而去即江州塗山是也有禹祠

及塗后祠酈氏辯之以爲禹娶在壽春當塗
非此倦游錄云禹廟後殿一瓊裘像侍衛皆
彝人云是禹婦翁也操小舟由龍門登岸龍
門者江濱積石中斷如門俗謂龍門浩巴人
謂小港爲浩今戎州亦有金箱浩也浩之上
瀑布如練數折入江右即粉水亦曰清水穴
穴右即海棠溪逆瀑而上石瀨泓然茆屋十
餘架閣以居畧徇通往來山半時有稻畦凡
十八里屢折益峻東倚奔峭西俯絕澗至一
天門更上二里許度回龍橋抵真武觀遵西

麓而上登鐵桅峰即塗山絕頂下視羣山纍
纍如蟻垤三江合流曲折正如巴字渝城孤
峙江中宛如龜之曳尾記稱渝城有門十七
九開八閉以象九宮八卦云西北為縉雲山
山有迦葉尊者手跡上有相思寺生相思竹
形如桃釵遵東麓而下石磴高危俯視千仞
今兩奴子夾持以行下山復登小舟順流至
朝天門林生別去分巡川東道曹君自成都
來訪余舟次知次公遊峩眉晡後入城報謁
赴陳都督招出歌兒度曲夜歸舟後舟復不

至計自嘉州登舟今已八日尚淹留于此殊

悶悶

初十日晨大霧林生來借得文選半部舟中無
書藉此送日耳生以其尊人命持巴字園詩
文集乞序飯後後舟到遂易巴船為下峽計
是日將遊海棠溪舟至遂弗果往午刻解纜
出巴峽王右丞詩際曉投巴峽即此過明月
銅羅二峽見岸上有豺五大才如犬見人殊
不驚晚抵木洞驛野宿驛在亂山中有神祠
十一日早發過養蠶堆金雞三背辰刻次長壽

蜀道縣志卷一
縣秦枳縣地晉樂城縣桓温伐蜀于巴之北
涪之南別置枳縣縣無城郭民廬官廨負山
枕江明末縣人陳尚書新甲城之未就靖難
時雪菴和尚遁跡于此與隱士杜景賢往來
白龍山中山有松柏灘灘水清駛篁蘿交映
結廬其間每夜梵誦琅然人或窺之乃易乾
卦也時棹小舟中流攜楚詞誦之誦一葉輒
投一葉于水投已輒哭人莫能測也縣治西
有張桓侯祠宋大觀中于祠下得三印及佩
鈎刁斗有飛名字晡過荔支園蔡君謨譜云

貴妃嗜涪州荔支歲命驛致坡公亦云天寶
歲貢取之涪或謂唐時涪及江津皆置荔支
園今江津尚有荔支數株涪則亡矣抵涪州
北門泊舟涪即古枳縣常氏云枳縣治涪陵
水會水經江水又東至枳縣西延江從牂牁
郡北流西屈注之酈注云庾仲雍所謂有別
江出武陵者也水乃延江枝津分水北注涇
涪陵入江故亦曰涪陵水今此水由黔之思
南府界流經彭水縣至涪州東城下入岷江
土人謂之黔江彭水董生來謁彭為涪屬南

邑入城報謁州守朱君留飲聞涪治尉解舊
有山谷碑不存

十二日五更登小舟遊北巖巖南對涪城江流
迅急逆流五里達北岸始曙岸上皆巨石石
磴自巖脚繚繞而上里許至普淨院舊址有
四賢涪州山谷尹和靖及郡人劉尚書
岌北上石壁橫可三十餘丈高可七八丈壁
間嵌山谷書鈎深堂三大字循石磴而上石
壁益峻有洞可十笏許南面江水即伊川先
生紹聖中謫涪註易處涪翁為題鈎深者也

西偏有小棧跨澗澗中巨竹數百竿夾棧而
生竹杪欄干詰曲孤亭翼然下臨江水風帆
沙鳥如在鏡中宋之碧雲亭也朱君重葺之
又修治鈎深堂遺址擇一二緇流居之其留
意文獻可敬也石壁題字頗多漫漶不可讀
有古樹穿巖裂石而上蟠曲如龍形王龜齡
大書龍樹二字于壁題名可辨者宋淳祐辛
亥左縣劉濟用三山林元成都杜庭燮三瀘
何績來遊嘉定中成都施擇善紀事又蔡白
石一詩云點易巖前露未乾臺臨水府碧濤

寒後儒若問伊陽秘一畫當年示子安朱君
以小舟跡至攜茗具留坐碧雲亭日出解纜
午抵鄴都縣水經所謂逕東望峽東歷平都
者也肩輿上平都山訪仙都觀故址觀王方
平麻姑二洞八卦臺臺前爲凌虛閣俯瞰青
牛白鹿二峰閣上一小石碣刻唐景龍二年
麻姑會方平詩二首俚淺可發一噓平都舊
有比干銅盤銘碑唐李虔之薛湜二仙公碑
杜光庭碑李吉甫玉石碑皆不可問矣閣燬
于姚黃之亂今制府始更興葺午後發舟風

勁甚過虎鬚灘更餘抵花林驛岸上無居人
不可泊移舟水陽溪石砧土司界民居數十
家語言冠服與蜀人不異

十三日五更早發辰刻至忠州漢地里志之臨
江南宋陞咸淳府水經江水又東逕臨江縣
南是也城堞冠山畧如巴涪列肆民居頗輻
輳程生來謁同遊屏風山山在岷江之北山
麓二石表一西南向者曰大禹廟一南向者
曰唐陸宣公神道東上數十步即禹祠榱桷
陋甚舊有少陵詩碣祠東北盤旋而上二里

許石級甚峻夾道修竹巖下石洞即宣公集
方書處洞左微逕達峰頂爲唐玉虛觀故址
一碑大書唐忠州別駕贈兵部尚書陸宣公
墓蓋宣公初藁葬于此有內江趙文肅公撰
碑東偏有故祠址數碑或立或仆道弗不可
行州守劉君踵至爲伐山開道拂拭出之乃
明嘉靖中錦衣陸炳二碑炳自詭宣公後也
聊城傅伯俊詩碣云祠前古墓于峰遶祠下
春江萬里流自是知臣惟聖主總爲別駕亦
忠州展拜畢劉守邀往龍興寺即少陵所嘗

寓居者今改名治平寺迫于解維不及往白
太傅祠舊在州西巴臺寺側臺爲巴蔓子所
登以望楚兵者東坡相傳在州宅亦蕪沒不
得其處矣山谷云樂天東樓以讌賓佐西樓
以瞰鳴玉溪登龍昌寺以望江南山張樂巴
子臺以會竹枝歌女東坡種花東澗種柳今
惟巴臺尚存髣髴耳西望高山連縣不絕石
砧長官司地也其宣撫尚馬姓即女官秦良
玉之孫乘風過石寶砦砦一巨石屹立江干
高可十丈許懸崖無路梯而升之上有二池

紺宇浮樹杪若下居人數百家昔譚氏據此
過石鼓峽大小磨刀灘水勢湍悍可畏更餘
抵壤塗野泊風寒

十四日辰至萬縣南二里許繫纜訪岑公洞洞
方廣一畝餘中二石如累碁屹立撐拄是鍾
乳所成其下有石臺洞門瀑布十餘丈自懸
厓飛下淙潺不絕下注溪澗寒沁毛骨洞中
一池亦石竇溜水滴成之洞皆沮洳斷碑甚
多率偃仆泥草中不可讀石壁上鐫錐殆滿
皆南宋人題名獨覓魯直務觀詩不得洞

口岑公洞三大字紹興辛巳郡守何桀書側
有嘉定間王侶紹之題名記書甚道媚文筆
亦可觀稍南一石表西向夾道巨碑林立其
一大書二絕句頗類山谷亦嘉定間人不著
名字一虛鑒真人贊元符二年知襄州柱國
借紫岑象求撰陽翟李薦書蓋巖起方叔也
岑公隋大業時人居此二十年得道仙去王
侶記以爲峽中之觀惟此洞及魯池不因江
以爲勝魯池在江北岸太白巖側苧溪上今
譚氏兩侯一居岑洞一居魯池山靈有知其

吐之乎萬為譚氏鄉里兵伯而民一占籍者
皆號隸侯府縣官戶口纔二十餘家晉省羊
渠置南浦即今縣地記謂其多勁勇少文學
迄今猶然問所謂東巖者舟人不能知山谷
詩空巖靜發鐘磬響古木倒掛藤蘿昏放翁
詩一疋寧無好東綃憑誰画此碧玲瓏當亦
佳處也午刻解維過巴陽峽有山九峰曰九
堆子開江自開縣來注于江開縣在劉宋為
新浦水經江水又東會北集渠注北水出新
浦縣北高梁山分谿南流一百里入胸忍縣

南入于江謂之北集渠口別名班口是也
南入于江謂之北集渠口別名班口是也
抵雲陽縣西三十里萬戶驛即漢胸忍舊縣
地里志容母水所出後周改為雲安水經江
水又東逕胸忍縣故城南劉賓客嘉話錄胸
忍蚯蚓也土多此蟲至夜常江畔出其身半
跳于空中而鳴其形胸忍曩向化侯譚詣以
水師三千駐此今省

十五日祭南岸武烈公

即桓侯

廟始發舟舟過東

洋子廟基子峽逼浪洶舟人皆呼譟奮力僅
而出險自嘉州至此踰旬未嘗有此險也橈

蜀道驛程記
手皆閩人蓋閩中投誠安插于蜀者過龍洞
沱四山雜樹丹黃相錯爛若雲錦人家茅屋
蔭映樹間皆有小艇以通往來有大小石城
產靈壽木可爲杖脯抵夔州府治奉節縣都
督陳君太守熊君令陳君皆來陳君與余共
事棘闡閩人也晚入城訪永安宮故址今爲
府學季漢治白帝城在瞿唐峽口永安宮乃
在城西三國志云先主改魚復爲永安仍於
州西七里築永安宮水經注謂宮前距平地
可二里許江山迴濶入峽所無放翁入蜀記

州在山麓沙上所謂魚復永安宮景德中轉
運使丁謂薛顏所徙比白帝頗平曠者是也
按周移信州治永安宮南則徙城在隋之前
然唐故夔州放翁謂與白帝城相連引杜詩
白帝夔州各異城爲據方輿勝覽亦云唐時
州理白帝而武侯廟在城西卧龍山上故少
陵詩云猶有西郊諸葛廟云云蓋周隋間曾
移城于此唐又還治白帝宋景德中又移今
治遂沿至今耳與陳都督登東城樓望八陣
圖時十月水落石出在江岸沙磧中去城僅

數十步煙霧障之不甚了了陳云雖晴霽陣
磧上時有氣若煙霧太守留飲詩史堂堂本
王龜齡先生守郡時因少陵建近十三家之
亂燬于兵太守甫興葺之堂後稍非山麓即
甘后墓僅存元碑一枚夔路儒學教授陳嗣
源撰按后卒于南郡章武二年謚皇思夫人
遷葬于蜀未至而昭烈崩丞相亮奏言夫人
梓宮在道園陵將成請追謚曰昭烈皇后與
大行皇帝合葬后之祔葬惠陵明甚此墓當
是傳疑今載祀典夜大風

十六日晨太守過余以小舟同往魚復浦磧上
觀八陣圖所謂六十四陣如棋盤二十四陣
如偃月不甚可辨太守云登高遙望行列宛
然近觀即存髣髴理不可曉按蔡氏云八陣
生于方圓方者坤圓者乾或謂風后因井田
之法以立兵制武侯得之布之魚腹壘或曰
武侯與風后名同實異不可知也都督相待
卧龍山下里許至少陵祠有石碣題唐杜工
部子美游寓處堂三楹祠中有沔陽陳文燭
修祠舊碑宋治平中知州賈昌言常刻少陵

夔府詩爲十二碑建中靖國元年運判王濂
又刻十碑于灤西果園今昆明池水一篇獨
完蓋後人別刻秋興八碑非宋之舊矣此地
在宋爲漕司即少陵灤西宅址連騎而東石
路頗坦迤山上女牆曰子陽城下爲下關城
稍折而南即白帝城二城犬牙相連城枕白
帝山石垣繚繞上極青冥水經注所云白帝
山北緣馬嶺接赤岬山其間平處南北相去
八十五丈東西七十丈東傍灤谿即以爲隍
西南臨大江瞰之眩目者也然入蜀記謂瞿

唐關唐故夔州與白帝相連關西門正對灤
瀕堆則臨瞿唐者當是唐之夔州非白帝矣
羊腸數轉始達絕頂正俯瞿唐兩崖灤瀕石
在其西孤峙江面南向爲昭烈廟規製宏麗
明良殿凡五楹中祀昭烈皇帝以武侯關張
配食像設古雅舊傳有山谷題名及元和碑
皆不存正德中行軍右都御史林公俊一碣
記舊有廟祀公孫述林以征藍之役駐軍于
此始廢述祀改創三功祠三功者后土氏江
瀆之神漢伏波將軍馬援也乃知此地曾祀

子陽及伏波矣放翁白帝廟詩參差層巔上
邦人祀公孫力戰死社稷宜享廟貌尊丈夫
貴不撓成敗何足論二公持論不同如此亦
各有見祠北即麝香山杜詩注引寰宇記謂
在秭歸縣東南者非東即瀼谿源出大昌縣
流經天池清溪南入草堂河曰瀼谿水流逕
赤甲白帝二山間逶迤入江又一水出大寧
縣流經郡北戚靜山亦南與瀼會少陵草堂
在其東河以得名蓋東屯故地寰宇記大昌
縣西有千頃池水分三道一道南流為奉節

縣西瀼水是也困學記聞東屯乃公孫述留
屯之所距白帝五里田百許頃稻米為蜀第
一放翁云土人謂山間之流通江者曰瀼猶
沱浩之類也瞿唐之上兩山夾立北為赤甲
南為白鹽對江山半有故城基略可辨識隋
仄尤甚僧言即古魚復縣漢江關都尉治都
督慨然曰古人設險良有深意今若治白帝
一夫當關可遏百萬之衆過今治遠矣放翁
謂今治比白帝頗平曠然失關險無復形勢
古今人所見略同也四顧江山雄麗緬懷霸

蜀道志
圖徘徊憑弔不能去都督開讌祠下奏軍中
之樂聲琅琅然與天風江濤相應酒行無算
移晷始告别諸君皆騎行送余由山麓出白
帝城西門門去江岸直下數十丈余震掉下
馬徐步舉少陵白帝城門水雲白低身直下
八千尺之句宛然目中余登舟諸君自崖而
反舟過灩澦自江中望之出江面可二十許
丈正當瞿唐兩崖之中勢如怒猊非尻南首
稍非即黃龍灘復有一石宛如研山兩崖各
百餘丈豁然中坳是爲峽門酈氏所謂廣谿

峽即瞿唐峽也蓋三峽之首峽程記三峽謂
廣溪峽明月峽仙人峽其瞿唐灩澦皆不與
者誤也記又云自蠻江桔栢沱導等江至此
凡二百八十江會于峽前實爲蜀江匯處峽
口有鐵柱二景定五年守將徐宗武作各六
尺四寸貫以鐵絙鎖峽者時江水既落明流
紆直白鹽赤甲峰巒交映鑿翠流丹四十里
間目不給賞山間紅樹與石色相錯如繡舟
人云山黃金也過臺閣子黑石虎鬚灘皆夏
秋江漲時最險處今猶湍悍可畏大抵夔峽

之山丹碧赭白不一狀其高刺天望若雲霞
山趾別有巨石似巨靈初闢斧鑿宛然如跗
承萼削壁萬仞瓌瓏凹凸割其片段皆米家
海岳菴中物也峽中風逆晚抵飛纜子泊去
巫山縣三十里陳都督遣小舟追送空青石
云建昌衛所產

十七日五鼓發舟風更逆卯刻抵巫山縣縣在
江北緣山爲墉正面巫山吳之建平郡也山
形絕肖巫字泊舟即騎登高唐觀觀在城西
土山三里許西山用兵日于此築堡遏賊荒

涼特甚朝雲之廟略無髣髴其東即陽雲臺
在縣治西北五十步高一百二十丈二山皆
土阜殊乏秀色而古今艷稱之詎不以楚大
夫詞賦重耶二山之間有楚王細腰宮址有
池曰楚王池東行二里許渡小河源亦出大
寧之千頃池至此入江水經之巫溪合聖泉
水南入大江者也溪東一山枕江岸之北與
巫山隔水相望曰筮篨山山前復有小山其
巔即神女廟舊燬于兵近始構茆屋三楹西
向冠帔儼然頗得婉孌幽靜之態有嘉靖中

范守已碑極辨神女是王母第二十三女爲
雲華上宮夫人嘗命其侍大醫庚辰童律虞
余等佐禹治水有大功德于人不應緣宋玉
微詞以兒女子褻之按六朝唐人詩多言入
夢之事白樂天刺忠州泝峽未至士人繁知
一先題詩廟中云忠州刺史今才子行到巫
山必有詩爲報高唐神女道早排雲雨俟清
詞時人傳爲佳話至二蘇乃作詩正之子瞻
云上帝降瑤姬來處荆巫間神容豈在猛玉
座幽且閑子由云堯使大禹導九川石隕山

墜幾折股丹書玉笈世莫窺指示文字相爾
汝騷賦之詞不必深辨也舊廟本在今巫峽
中十二峰下去縣東四十里范石湖吳船錄
載之甚晰父老二人爲余言廟址在飛鳳峰
有古碑以江濤洶怒不可繫舟前代始移于
此廟西有琵琶峽相傳其鄉婦女多善吹笛
嫁時諸女子相與吹笛唱竹枝送之陽臺之
南爲南陵山有晉南陵故縣址山凡一百八
盤山谷歌羅驛詩浮雲一百八盤縈落日四
十九渡明鬼門關外莫言遠四海一家皆弟

兄命輕人鮚甕頭船日瘦鬼門關外天北人
墮淚南人笑青壁無梯聞杜鵑按鬼門關在
夔州東北三十里人鮚甕在歸州四十九渡
水今黔江縣柵山即其處也舟入巫峽酈注
謂杜宇所鑿者也迴望神女廟陽雲高唐臺
觀帆遠猶見過三分水山益奇麗有神鴉四
五飛逐行舟以肉擲之妙如承蜩飽即歸巖
洞中入蜀記云神女祠舊有烏數百送迎客
舟乾道元年忽不至至今絕無一烏蓋放翁
時未之見也過此即十二峰舟人指似得其

六七縹緲秀拔令人有駭鸞駕鶴之想中有
三峰連綴其一修纖如人揚袂而立俗曰美
人峰即放翁所謂神女峰最為纖麗宜為仙
真所託者也會風急灘迅所謂十二峰者不
及盡矚然陸務觀范至能經此所見亦僅八
九峰耳至萬流驛入湖廣界巫峽之山奇處
與夔峽相埒十二峰娟妙不啻過之晚抵門
扇峽泊舟去巴東三十里

十八日早發過西瀼記稱少陵亦嘗居之有草
堂遺址考少陵年譜以大曆二年居夔州瀼

西草堂三年正月去夔有將別巫峽贈南鄉
兄讓西果園詩三月即至江陵秋移公安未
嘗淹留巴東復有西讓之宅蓋土人以山間
之流通江者通呼曰讓讓西名適相類因傳
會耳抵巴東縣湖廣荊州府界縣無城郭茆
屋數十家枕山臨江而居謁寇萊公祠祠在
巴山南麓茅茨陋甚一碑偃仆沙土中拂拭
觀之乃王梅溪先生乾道二年立門人王蒙
書碑已中斷循祠東上有平臺即秋風亭址
柱礎猶在其西白雲亭與公手植二栢久已

化去二亭皆倚巴山之麓中為壽寧寺寺後
有泉流遶寺門下入于江雖大旱不涸曰相
公溪溪上有石梁曰相公橋萊公所嘗吟眺
處也公在巴東有野水孤舟之句為人傳誦
然公此中詩尤多佳句如印鑱殘陽後人歸
疊翠陰水穿吟閣過苔遶印床斑衆木侵山
徑寒江逼縣門皆錢郎之選也巴東山水頑
劣自夔巫東下驚心動魄應接不暇至此賸
水殘山不堪著眼而放翁謂白雲亭為天下
幽竒絕境且云自吳入楚行五千餘里過十

五州亭榭之勝無如白雲者豈山水亦因時而顯晦耶或云白雲亭在秋風亭北上近白鹿洞未知孰是午晴無風舟行稍駛過業灘白浪洶洶一葉之舟飛舞掀簸而下舟人諺謂水大畏業灘水落畏新灘夏秋之交則篙師束手商舶裹足險可知矣再過吃灘亦曰鮐灘即人鮐甕也險與業灘等抵歸州泊拘灘州城在江北山巔江南有楚臺山上有楚王臺及舊秭歸城址水經江水又東過秭歸縣之南注謂依山即坂南臨大江即劉備城

也蓋今州治歸山水粗劣與巴東略似三閭大夫實產是鄉今屈原宅女嬃廟女嬃砧皆在七里有宋玉宅放翁入蜀時尚見石刻王龜齡詩城郭舊爲夔子國人民多是楚王孫陸務觀詩江上荒城猿鳥悲隔江便是屈原祠一千五百年間事只有灘聲似舊時何仲默詩古郡山頭數家住客舟江上一燈明竹枝慣聽巴人曲鳥道纔通楚國程荒山寒日江聲怒號獨坐吟此數詩不必猿鳴三聲淚霑裳也午後風大作仍泊拘灘

十九日五更山行之屈沱謁三閭大夫廟廟負
山面江有元至正甲申湖廣儒學提舉黃清
老碑碑載唐元和十三年刺史王茂元始創
此祠宋元豐三年封清烈公復立廟云登舟
三十里過香溪溪出興山縣昭君村水碧如
黛南合江流溪上民居數百家頃西山用兵
此爲儲胥之地過兵書峽峽半石壁有洞中
有石形如卷帙俗謂武侯兵書遙望峽口煙
靄明滅虧蔽萬狀稍近之則驚濤如雪浩洶
恐人聲聞數里大石傾墮橫牻水面楚蜀間

第一險也入蜀記謂南曰官漕北曰龍門或
謂即注之新崩灘然彼乃在巫峽中大巫山
之上去此已二百餘里土人云此本舊灘嘉
靖中龍起山崩水勢騰湧因號新灘按放翁
已謂新灘峽中最嶮處非輕舟無一物不可
上下則其由來舊矣遣僕輩移行李由井岸
行獨坐舟中看漁人十餘立灘口大石旁截
流拋網頃刻得魚數千頭有尺餘者從人往
買之不肯受直云斤止三銅錢也灘上人家
百餘依巖以居男女皆能背負人可百餘斤

自上灘至下灘五里受直亦止三錢耳余由
龍門北騎行岸上皆磐石陬互交加累積不
可殫形俯看虛舟放溜其疾如箭撇漩而下
令人骨慄余先至下灘候行李舊聞地產石
燕在北崖寺後令人于澗石中覓之得數十
枚雄者頂類螺子雌者形類海蚶殊不似燕
也午後始解維入空舸峽即經所謂埤竈注
稱宜都建平二郡界也秀拔峭絕畧與夔巫
相埒壁上多石洞孔穴玲瓏似仙靈所栖止
峽中有馬肝石故又稱馬肝峽峽勢高險蔽

天陽景罕曜舟行其中謂已向夕及連峰稍
斷忽見日景始悟酈氏云三峽七百里中自
非亭午夜分不見曦月語不妄也歷達洞羊
腸虎臂使君諸灘險晚泊屈溪

二十日早過黃牛山謁黃陵廟廟在山麓頗宏
麗前祀黃陵之神旁一黃牛舊鐵鑄今易以
木後祀諸葛忠武侯侯入蜀于山巖上見神
像旌旗始立此廟侯像設是石砮司宣撫女
官秦良玉造有崇禎壬申題字登名山大川
閣望天柱諸峰尋歐公詩刻不可得惟正德

蜀道驛程記
庚辰南太僕少卿西蜀劉瑞所撰黃陵神績
頌詞甚馴雅書學歐陽率更碑額篆書亦妙
碑首刻鳥獸形甚竒古祠門石幢一枚刊武
侯廟記是近時重刻俗書遙望祠後四峰如
屏風狀絕頂上有黃牛昂首北向頭角宛然
有一人立牛側如繪畫人牛皆有神氣注謂
高厓間有色如人負刀牽牛人黑牛黃成就
分明驗之良然李長庚云色當作石非也自
此下黃牛灘歷扇子峽數十里間皆土山戴
石峰巒森削至蝦蟆碛泉從巖腹洞中流注

蝦蟆口鼻間成水簾下入于江濺珠歎玉望
之極可愛蝦蟆形尤肖似放翁謂其頭鼻吻
頷絕類而背脊炮處尤逼真果然踏江中亂
石溯瀑而上從蝦蟆背至洞中水自洞出聲
如風雨中有巨石泉滙其下為池清泠沁骨
巡覽壁間都無前人題字蓋石質麤踈不任
刻畫尤易剝蝕故也循碛左而下衣履盡濕
大索舟中瓶盎止得三四盡汲貯之此水水
品列在第四山谷記云泉味亦不極甘冷慰
人齒惜自蜀來無佳茗試發之耳順流下西

陵峽蜀江之險始此即東來入峽之首也峽口有三遊洞昔白樂天自江州司馬遷忠州刺史與弟知退偕行元微之自通州司馬遷虢州長史遇于夔陵同遊此洞各賦詩二十韻白記其事洞以名焉山谷入黔放翁入蜀皆作記二蘇公嘗侍老泉遊此亦各有詩載集中余發興獨往躡巉巖而上甫行半里舟人云徑久荒翳迫發舟廢然而返昔人謂身到處莫放過固未易言舟出下牢溪望虎牙荆門二山錯峙江上注所稱荆門虎牙楚之

西塞也此下即荆江江流洪濶舒緩遠山映帶自入峽七百里重巒疊嶂虧蔽霄漢至此始覺天日清朗杜詩云始知雲雨峽忽盡下牢邊歐陽至喜亭記云蜀舟至此者必瀝酒再拜相賀以為更生萬里征人飽歷三巴夔巫之險至此而慰藉可知也午抵彝陵州州古西陵又曰峽州水經注江水又東逕陸抗城北北又云北對彝陵縣故城楚襄王二十年秦白起拔西陵二十一年燒彝陵是也公孫述拒岑彭陸遜拒昭烈陸抗拒王濬皆以此

蜀道驛程記
地爲攻守要害今設重鎮于此城郭雄壯西
臨大江實荆岳之門戶泊舟入城訪歐陽公
絳雪堂故蹟聞至喜堂記山谷書尚存斷碑
數十字在東門民家作砌石語州守以他石
易之昔放翁過彝陵時紅梨花已不復有惟
公手植雙栴尚存其一今亦化劫灰矣喚小
舟橫江而西獨遊西山甘泉寺寺踞土阜頗
荒閬崖下有孝婦泉入綠蘿谿注于江按水
經注載姜詩江陽人華陽國志亦列江陽士
女歐公嘗疑之泉上有祠今廢歸舟候橈手

不即至晡後始解維行十五里野泊

二十一日早發次宜都漢武帝所置彝道縣也
三國張飛陸遜皆守此爲吳蜀要害唐又以
宜都峽州地爲東松州縣治在荆江之東清
江自舊施州開蠻界來與江合色如翡翠可
愛即水經彝水從佷山縣南東北注之者也
城北十里獠亭吳人破漢軍處今小有聚落
曰虎腦碛張獻忠自荊州入蜀經此復懼棗
塔諸賊之亂巷無居人已刻發舟城南里許
彝水合江處清濁劃然十許里過白洋驛驛

後有張商英墓午過枝江古羅國亦曰丹陽
蜀江至此始分枝爲諸洲有沱水班氏地理
志謂江沱出西東入江注上明城北據大江
江沱枝分東入大江縣治洲上故以枝江爲
稱是也初治百里洲梁陸法和所居洲上有
庾臺即庾子山故宅今爲庾臺寺昔楚懷王
客死于秦還楚葬此時郵置歸併宜都松滋
二縣未泊即發午後風大作一葉簸蕩巨浪
中前後舟俱相失長年皆巴郡人不識荆江
水道面盡土色薄暮風益逆今橈手十餘人

循西岸牽挽更餘始行一二里得泊處去松
滋尚遠危坐待曙夜大風不止東坡詩云賦
命窮薄輕江潭今乃益信

二十二日風稍息卯刻達松滋縣松滋本楚鳩
茲漢景帝時爲高成所謂滄山滄水所出是
也亂後闌闐寥落縣令適赴鄂尉深避不出
乃自出直傭宜都橈手送舟至江陵而余先
登宜都兵船以行蓋兵船有橈十枝號內河
船視川船較輕疾耳明伍忠襄文定縣人有
祠不及謁過松滋渡雀兒尾江面益濶四望

莽蕩了無一山與西陵以上迴不侔矣孟松
滋詩云獵響驚雲夢漁歌激楚詞杜詩云紗
帽隨鷗鳥扁舟繫此亭欲賦一詩憶此二篇
遂閣筆暮抵荊州府治江陵縣泊舟燒雞窪
去沙市十里

二十三日入城晤川湖制府蔡少司馬顯齋及
分巡上荊南道王副使鳴石郡丞張秀升同
年秀升留飲擬以次日束裝陸行趨襄陽荆
州故楚郢都漢之南郡古稱用武之國江水
逕其城南漢水在其東北又有漕河為沮漳

諸水所道即今沙市河杜預傳開楊口起夏
水達巴陵內瀉長江之險外通零桂之漕是
也自六朝為江左上游都會語謂琵琶多于
飯甑措大多于鯽魚唐宋迄明衣冠文物號
稱極盛崇禎時流賊亂楚豫間蹂躪最酷先
是張獻忠詐陷襄陽襄王遇害督師閣部楊
嗣昌自裁賊遂長驅陷荆俘民入蜀繼此西
山賊號十三家盤踞鄖夔間峽路不通者二
十載康熙三年合秦楚蜀兵三路大舉賊始
勦除峽路復通而荆之凋敝極矣曩故明世

宗朝先曾祖大司徒公起家荊州府推官神宗時復自順天府尹填撫三楚天啓丁卯歲惠王之國荊州先祖方伯公實以儀郎充副使緬懷往事今昔之感深矣夜宿館驛

二十四日早赴鳴石招歸館遣重慶舟及夔州兵還蜀作書謝陳都督午後赴制府之招問張文忠居正祠堂已毀惠王故宫本五代高氏所築子城明初湘獻王居之號湘城及惠王就國復居之更號惠城今亦爲瓦礫矣

二十五日早發騎行江陵城北十五里即荆門

州界彌望黃茆白葦十月中木葉盡脫此去彝陵二三百里峽中尚未搖落而此間風物已如此暮抵建陽驛

二十六日五更大寒早行午至荆門州安陸府界漢臨沮當陽編都三縣地隋之長林也城在陂陀之下兵民錯居順治初設重鎮于此扼荆襄之衝以備西山寇盜賊平後移鎮彝陵改設遊擊一員駐此會日暮州守與州將高宴醉甚余不得已先騎而行更餘抵小南橋諸從人三鼓始至云州北十里遇虎衆列

炬譟逐久之乃去館人云此地至宜城最多
虎害日暮無敢行者宋陸子靜先生曾治此
州有祠廢為馬廐頃聞道州守某以周茂叔
先生後裔逋賦輒至濂溪祠堂械繫神像則
象山祠之廢宜也楚絕書云州東南有內方
山楚故略云內方山在漢川縣西五十里禹
貢內方至于大別即此蔡注云內方山在荆
門軍長林縣誤山名偶同耳

二十七日騎行盡日行童阜犖确中荆棘彌望
陂陀高處西望漢江在三十里外鍾祥潛江

二縣界也楚絕云漢水經州東北過新城沙
洋北有象河官堰河南泉溫泉蒙泉惠泉藻
湖晡抵麗陽驛

二十八日曉發荒原寒燒徧野黑墳土人云地
荒多虎燒野以便行人耳宋玉墓在宜城南
三里有明都御史路迎撰碣按酈注宜城城
南有宋玉宅玉邑人渚宮故事庾信因侯景
之亂自建康歸江陵居宋玉故宅宅在城北
三里今歸州亦有宋玉宅實宜人也抵宜城
縣縣古郢地隸襄陽府地里志所謂故鄢史

記楚昭王畏吳非徒都都頃襄王十六年與
秦昭王好會于鄢是也山川頑劣而多產才
士宋玉王逸段成式皆生其地今叔師故宅
在城南故宜城西柯古吾鄉臨淄人又云梁
鄒人其父文昌封鄒平郡公今鄒平有地曰
段橋傳爲文昌舊居而宜城有木香村亦云
段氏故宅所未詳也又唐處士王士源藻思
清遠深鑒文理常造亢倉子九篇撰孟浩然
詩序其文清綺如魏晉間人亦宜產

二十九日五更早發過杜康臺下有井曰杜康

井城北十五里過黃叔度墓有明督學徐枋
撰碑自此傍漢江行青山白雲風帆沙鳥頗
極曠淼之觀江濱驛路坦夷村墟相接由宜
達襄陽百里間東漢時刺史二千石凡數十
人朱輪相望號冠蓋里江東數峰秀色欲滴
問輿人知是鹿門蘇嶺諸山龐德公孟浩然
皮襲美隱居宜城梁洲亦曰鹿灘即龐
德公司馬德操望衡對宇處也上有鹿門龐
居二寺以龐居士得名峴山在江岸西北羣
峰迤邐北趨郡郭習池在南麓一水泓然下

布文石翠鑿毛髮濺珠浮水面與吾郡趵突
珍珠金線諸泉相似池方廣畝許稍東復有
一池才如半規流出院外非滙爲小潭復伏
流而南爲溪由鳳皇亭下注漢江至今襄陽
太守例以三月三日禊飲于此池後觀音閣
即古谷隱寺復非三里許爲羊太傅祠門外
瀕江有碑明世廟南巡遣駙馬都尉鄔景和
諭祭文也祠門下刻晉碑所謂墮淚碑也襄
陽耆舊傳謂李興初撰梁大同十年改立後
碑劉之遴撰劉靈正書祠中石幢一枚刻宋

慶曆七年十一月六日中書劄子及尚書工
部員外郎直龍圖閣知襄州事王洙原叔重
建羊侯祠廟詩和者范文正公○端明殿學
士兼翰林侍讀學士尚書禮部侍郎充集賢
殿修撰知河陽軍事李淑○尚書屯田員外
郎知光化軍事李宗易○提點河東路刑獄
尚書祠部員外郎張去惑○太常博士孫抗
○大理寺丞韋不伐○給事中知蔡州事吳
育○太子府率致仕李康伯○大理評通判
蔡州事劉敞

原文稱
龍圖舅

○匠作監丞通判襄州事

賈黯○河陽節度推官裴昱○滄州觀察推
官馬雲○均州鄖鄉縣尉黃通○守宣城縣
令連庠又宋人題名備錄于此○天章閣待
制知郡事劉元瑜新保州倅虞部郎中路綸
郡倅比部外郎朱适都巡檢崇班王世良長
林令何异穀城令張唐英襄陽尉李旭同遊
峴山置酒賦詩嘉祐六年辛丑十月四日竹
山令權襄陽縣安宗奭奉命書○黃堯允元
之提刑湖南石璘子文奉使襄廣胡宗回純
夫別于峴山之亭元豐庚申仲冬癸巳宗回

謹令男義脩題○太守孫頤景脩同湖南運
使苗時中子居運判唐義問君益遊此熙寧
丙辰仲春十一日○范準夫以檄覆檢襄陽
邂逅李子昂蔡昌期同宿鹿門別院次早再
登此崇寧壬午仲春初三日○吳周卿趙德
麟趙君度謝公定魏道輔魏承老同來庚辰
二月六日○郡太守岑巖起飲餞前熙帥鍾
弱翁于此吳周臣趙德麟魏道輔李方叔俱
至元符元年六月十日○畢之進代歸賀君
儀趙德麟李仲益馬汝楫董君序魏道輔周

蜀道驛程記卷一
共叔同餞紹聖丁丑二月五日○右題名七
則字畫端勁大者方圓徑寸小者殺其半非
俗書也道士俗人不解寶惜語今作一欄楯
護之惜然不應將來恐漸就湮沒恨匆匆不
及摹搨也祠在峴山東麓下俯漢水非即峴
首有亭會日暮將渡漢之樊城竟不及登峴
西北十里為萬山山下有潭杜元凱沈碑處
孟詩神女昔解珮傳聞于此山蓋解珮渚亦
在其下矣漢水自蟠冢來經漢中鄖陽二郡
至此水經漢水又東過襄陽北又東合檀溪

水蓋漾水沔水漢水滄浪水實東漢一水隨
地易名南至江夏沙羨非入于江經所謂沔
水與江合流是也余以閏七月渡沔過蟠冢
實東漢發源處今行萬里下三峽復與沔水
相見未免有情而余行役之久可知矣漢水
新綠可愛古稱如鴨頭信然江北岸即樊城
仲山甫所封國漢昭烈帝依景升時屯此經
云沔水又逕平魯城南者也樊與襄陽隔水
相望實為南雍屏蔽盛時為吳楚大賈輻輳
之所酒樓歌館鱗次十餘里自闖獻二逆相

繼陷襄皆先據樊由白馬洞南渡數年來流
移稍歸居人尚數千家祿襄陽府治襄陽縣
三十日風寒發樊城午後渡白水水經之清水
也出弘農盧氏縣攻離山山海經作
支離之山南過新野
縣西下入于沔經所謂清水從北來注之注
云宛口者也水中多沙洲羣雁翔集嘹唳動
人西即湍水經謂出酈縣井芬山至新野縣
東入于清注云東分爲鄧氏陂漢太傅禹故
宅也騎行更餘始抵新野隸河南南陽府有
漢光武昭烈二帝廟城南花陂陰麗華故居

城內有古城號曰子城昭烈屯新野時築
十一月初一日發新野縣過樂廣故里所謂樂
宅戍也清河旁白水村有巨碑三一書漢光
武皇帝故里一書白水村一書貴人鄉考白
水鄉在章陵乃今棗陽縣地暮抵林水驛即
小長安城光武爲甄阜所敗處

初二日早過古三公廢城竝清河東岸行卧龍
岡在西岸松柏鬱然樓觀頗壯土人云河湍
急無舟梁遂不果渡按襄陽城西有隆中山
爲忠武躬耕處習鑿齒云武侯家南陽之鄧

縣在襄陽城西二十里又酈注稱檀谿之陽
有崔州平徐元直故居檀谿與隆中皆在襄
陽城西二人與武侯為友故知襄陽之隆中
為近也又七里渡涪水次南陽府治南陽縣
郭外望見紫山注謂梅谿水出紫山逕百里
奚故宅其東井一山突起單椒傑立如吾鄉
華不注曰獨山有召杜元凱三公祠再渡涪
水暮抵博望驛漢武元光六年封張騫為侯
國劉表遣昭烈拒夏侯惇于博望燒屯偽遁
因伏兵大破之即此地

潢川盛溢虎豹皆股戰東坡昆陽城賦所謂
屠百萬于斯須曠千古而一快者千年而下
為之神王水經云潢水出南陽魯陽縣西堯
山又東南逕昆陽縣故城北注潢水東逕西
不羹亭南于定陵城北東入汝班志襄陽有
西不羹

初五日五更早發過汝濱注云寄額城西北濱
水出焉世亦謂之大灑水濱者汝別也再過
湛水京相璠曰昆陽北蒲城有湛水按裕州
南水皆趨洧以達于漢自葉縣諸水如潢如

醴如昆如湛皆趨汝潁以達淮泗注謂湛水
出隼縣北魚齒山東入汝出河內軹縣者別一湛水又云汝
水又東南昆水注之水出魯陽縣唐山汝水
又東得醴口水水出南陽雒衡山二十里過
首山史記黃帝采首山之銅鑄鼎于湖莊子
黃帝登具茨訪大騏命駕于襄之野七聖皆
迷即此迤西為令武山土人謂楚將軍景差
與秦戰歿于此山椒有祠考史記楚懷王二
十九年秦復攻楚殺將軍景缺又考烈王六
年秦圍邯鄲趙告急于楚楚遣將軍景陽救

趙無差名而差與宋玉唐勒皆屈平弟子號
工詞賦或謂招魂是其所作亦不云為將軍
此祠闕疑可焉又五里過汝水次襄城縣隸
開封府水經汝水出河南梁縣勉鄉西天息
山注謂出魯陽縣大孟山黃栢谷又東南逕
襄城縣故城南說苑云襄城王衣翠衣帶玉
劍履縞舄倚徙于流水之上楚大夫莊辛過
而悅之拜謁曰臣願把君之手可乎襄城君
不悅莊辛曰君不聞鄂君子皙感越人之歌
乎襄城君乃奉手而進之即是水也襄古汜

地周叔帶之亂鄭納襄王于汜城因以名城
據汝潁要害爲南北必爭之地明末李自成
破襄與總兵官左良玉相拒郟城督師兵部
侍郎汪公喬年以三鎮兵出關由郟縣趨此
欲與良玉夾擊甫入城賊卒薄城下三總兵
官賀某鄭某牛某不戰潰而西去公獨與襄
人堅守城陷罵賊死今襄人春秋祀之井門
外渡潁水經云潁水出潁川少室山注云潁
水又東南江陂水注之水受大崇丘城南故
汾丘城在襄城縣之東北也今地曰潁橋有

潁考叔冢其北有鄭莊公城大隧遺蹟二十
里過李元禮墓晡抵閭寨保

初六日五更早行辰刻次禹州州治西北羣峰
蜿蜒遙連嵩少城負其陽望之在煙靄中禹
本鈞州以明神宗廟諱改今名古陽翟禹初
封也春秋鄭之櫟邑漢潁川郡治兩漢以來
爲名士淵藪北宋時名臣尤衆有如田況田
晝孫甫崔鷗之屬明時馬端肅公身都將相
爲一代偉人蓋嵩洛之會也食畢即發東門
過清潁亭下臨潁水水經潁水又東南過陽

翟縣北班志云東至下蔡入淮行千五百里
涉潁而北單椒沓嶂不可殫名最奇者曰九
山曰具茨曰空空同先生李夢陽葬于此
山明末寇亂盜發其藏北平人韓鼎業斂其
骸骨封樹之世多其義過黃臺黃次公祠涉
潁水水經出密縣大騮山注即具茨東南入潁暮
抵新鄭縣城南五十里過周世宗陵三十里
過裴晉公墓里許涉洧水經云洧水出密縣
西南馬領山注亦云出潁川陽城山班志同又東過鄭縣南注洧
水自鄭城西北入而東南流逕鄭城南其上

即子產以乘輿濟人處縣故軒轅有熊氏國
鄭滅鄆徙居此曰新鄭君乙二十一年韓哀
侯滅鄭復徙居之所云鄆居陽鄭之間食溱
洧焉溱水亦出密縣東南流至新鄭城西北
與洧合班志云洧水東南至長平入潁行五
百里也縣為高文襄拱故里宋名臣王沂公
魯簡肅公歐陽文忠公呂正獻公皆葬于此
蓋潁川在宋時為近畿鄉相多賜葬地他如
范蜀公葬襄城楊文公蔡文忠公晏元獻公
宋元獻公兄弟皆葬禹州不歸葬也

初七日次鄭州唐滎陽郡宋奉寧軍靖康中置
四輔之一也周初封管叔于此今城北二里
有管城其東六里曰邲城楚子敗荀林父處
昔鄴之戰郭李在軍而無救于敗邲之戰士
會在軍而僅能自全軍令不統于元帥而能
勝敵者寡矣宋藝祖賜曹彬劍曰副將以下
不用命者斬真古今命將之良法也州有鄭
水京索二水入之宿滎澤縣

初八日發滎澤禹貢滎波既豬注云沈水溢出
河爲澤今塞爲平地滎陽民猶謂其地爲滎

澤在縣東王伯厚詩地里考曰今鄭州滎澤
縣也春秋衛及狄戰于滎澤即此地西南有
傲城殷仲丁遷都于傲括地志曰即滎陽故
城周宣王狩于圃田及于敖山作車攻之詩
項羽圍漢高于滎陽紀信誑楚皆是其處今
有信祠廣武山在縣西境有東西廣武二城
酈注漢明帝時議治汴渠樂浪人王景築堤
起滎陽東至千乘海口千有餘里所謂金堤
也渡河宿新鄉縣

蜀道驛程記卷下

蜀道驛程記

卷下

弟士驪


男啓涑

啓沔

啓汧

孫男兆鄧全較

5年10月



蜀道驛程記卷下

弟士驪

男啓涑

啓沔

啓汧

孫男兆鄴全較

